

## MARKO Kale Wĩ a Nde Ayekĩ Marko Tsele Ke a

*Yohanes Mui Owolane a De Letsã Ne Kale Wĩ a Akũ.*

I Ade Kale Wĩ ne Yesu Kristo kĩ enye Baguma obi akũ kayokayi a.

II Ane kókóe a mọ Baguma Onukpẹ́ Onyene Yesaya tsele eyi kĩ Baguma bi ye obi kĩ,  
“Maado yĩ fọtọ onyane enya nọ loto,  
eyaalola osi eyi ekpa nọ.

III Aanu kĩ oti kĩ tse yade letsã ne kosa kame kale kĩ,

‘Mimane osi mikpa Olate a kaya.  
Mikena osi a eyo kpĩ.’ ”

IV Fọtọ Onyane kĩ nye Yohanes kĩ ena ne kosa kame ekawola bati mui ne owọ kame nde ayekĩ Yudafo akena a. Emini ede letsã kĩ bati bedani be tawole kame, bete mui kawola amanie a, lokoa Baguma aakoa be titikpa ete be. V Bati pii to Yudea tite a akũ mọ be omato kpale kĩ bave Yerusalem, benaa kosa a kame, kĩ banaatse Yohanes oledo. Bibinya be tokpa kame betsa Baguma, ade Yohanes wola be mui ne Yordan owọ kame a.

VI Lokọ a na kame ni, Yohanes do oponko mọ kane mọ lopo tolo tetadie, ekọ oyae ovoli owẽ ebọa kate. Ye funitsã nye kosã mọ koolo.

<sup>VII</sup> Ede letsã kī, “Oti a kī yaaya ne yī liti a, ebẽ yī kɔlaa kī ntáfeta kī makena akū nwũnya mpabua ne ye abɔa malo.

<sup>VIII</sup> Yī kō mui nkɔa makena mui kawɔla amanie, leme ye kō yaakɔa Hũhũ Kpalewa ewɔla mi mui.”

*Yohanes Wɔla Yesu Mui.*

<sup>IX</sup> Owi tábuna mɔ Yesu to Nazaret ɔmato ne Galilea tite akū, eyate Yohanes mui kawɔla amanie a ne Yordan ɔwɔ kame.

<sup>X</sup> Kī Yesu sila ené eto mui a kame a, emɔ kī odetó kame binya ade Hũhũ a ka eko ne ye akū nde ayekī mbloduma aka a.

<sup>XI</sup> Ade ɔledo ne eto ode ele kī, “Nɔ nye yī obi kī maátunɔ kale, kawɔle ade yī ne nɔ akū.”

<sup>XII</sup> Letaletã Hũhũ Kpalewa a kpã Yesu enamena kɔsa kame ne awã kī tuwĩ kame bayae deĩ.

<sup>XIII</sup> Ye odi ena ne awã fuwi tɛna. Lɔkɔ a na kame a, Abonsam sɔ Yesu edã, ade ode fɔtɔ banyane yasum ye a.

*Yesu Nye Ye Fɔtsa Bakɔlene Batɔnyade.*

<sup>XIV</sup> Lɔkɔ a kī bipi Yohanes bido ne kɔla kame a, Yesu dzakū enaa Galilea enale Baguma Kale Wĩ a ne awã.

<sup>XV</sup> Ekale ne awã kī, “Lɔkɔ wĩ a wo ɔtɔ ade Baguma legākanya lɔkɔ a fuã. Mimuniki ne mi tokpa liti lɔkɔa mite Kale Wĩ a mido!”

<sup>XVI</sup> Kī Yesu kamini ne ɔwɔ lutubu baũ ɔwẽ ne Galilea tite akū a, emɔ kɔfɔabi banyene nviã kī benye Simon mɔ ɔwaẽ Andrea, bekata be tesau.

<sup>XVII</sup> Ade Yesu bi be kī, “Miyaatomɔ yī, lɔkɔa maakena mi bati banyene.”

<sup>XVIII</sup> Ne awã naa, befɔne be tesau awe biyidza bitomɔ ye.

**XIX** Kĩ benaa loto sukuloo a, emo bawae nviã Yakobo mo Yohanes. Bena ne be okolo kame bekalola be tesau.

**XX** Kĩ Yesu mo be a, eve be deedimape ki bitomo ye. Be malo biyidza letaleta, befone be olega Zebedeo mo ye adzuma bakenane a odi ne okolo a kame, ade bitomo Yesu a.

*Yesu Blomena Hũhũ Kpa Etomena Oti Odi Kame.*

**XXI** Yesu mo bikĩ bitomo ye a nawo omato ki bave Kapernaum. Ne Yudafõ Kaweya Luwi a ki litomo be awã kawo luwi a, Yesu naa Yudafõ katsenakõ enatsa fotsa.

**XXII** Bati a ki binu ye fotsa katsa a kena saa, kitoneki fõvemenane ne Yudafõ mbla batsane a fude akũ, mbom ye etsa fotsa mo owole kame kobẽ.

**XXIII** Ne loko a na kame a, onyole odi ki hũhũ kpa deĩ ne ye kame na ne be katsenakõ a,

**XXIV** ade eboa fowola kooba ki, "Yesu Nazaretni, litsa deĩ ne bomo no kayite? Oya ki ayaawola boe mboee? İnyina oti a ki ane. No nye Baguma Oti Kpalewa Kĩ Bido a."

**XXV** Yesu wũni ne hũhũ a akũ ki, "Sua onukpẽ, kane ne oti a kame."

**XXVI** Hũhũ a fufulinya oti a mo osĩ, efõ eboa fowola kooba ade ene ne ye kame a.

**XXVII** Fokena bati a flee ki bedza ne awã saa, ade bivia be akũ ki, "Litsa ne awĩ a? Ei! Fotsa katsa voẽ odabe ne awĩ a? Oti kũ deĩ kobẽ yawũni ne hũhũ kpa akũ ade yatse ye oledo a!"

**XXVIII** Foesũ Yesu dĩ gba ne Galilea tite akũ flee.

*Yesu Tsa Bati Beblebee Fõso.*

XXIX Yesu mo ye fotsa bakolene, Yakobo mo Yohanes dzakũ ne Yudafɔ katsenakõ a, ade benaa Simon mo Andrea toto kame a.

XXX Kĩ biwo awã a, badi bi Yesu kĩ Simon nyina waa yaso, ye akũ bo hlihlihi.

XXXI Foesũ Yesu wo ne ye sekẽ, ade epi ye ne kɔkpɔ edzela ye kĩ eyidza. Deedimɔape foso a do ye, ade eyidza esum be a.

XXXII Kĩ suwa tomu a, bati kpã basone pii mo bikĩ hũhũ kpa deĩ ne be kame a beyamena kĩ Yesu etsa be.

XXXIII Bati ne omato a kame yaboa obũ ne onyukpẽ.

XXXIV Yesu tsa bati pii kĩ baso foso aholo aholo, ade eblomena hũhũ kpa etomena bati pii lemẽ kame a. Yesu takpa hũhũ a osi bele kodzela kitonekĩ binyina ye.

*Yesu Le Kale Wĩ a Ne Galilea Tite Akũ.*

XXXV Odenyinawi a, Yesu yidza ne toto a kame, ene ne omato a kame enaa awã kĩ oti odima tafuã, enaboa mpaẽ.

XXXVI Lemẽ Simon mo bikĩ bitomo ye a ne betse bawe Yesu.

XXXVII Kĩ bemó ye a, bibi ye kĩ, “Odi nye odi lamena no kawe!”

XXXVIII Lemẽ Yesu bi be kĩ, “Mifõ bonaa tukula bebã kĩ tifuã a lemẽ kame. Kefeta kĩ mabi be malo Baguma foletsa, kitonekĩ ade foesũ iya ne katinya kame a.”

XXXIX Foesũ enamini ne Galilea flee. Etsã ekale Baguma foletsa a ne Yudafɔ fotsenakõ, ade ekablomena hũhũ kpa kanemena ne bati kame a.

*Yesu Tsa Onyole Odi Kĩ Yaso Foso Ngbã.*

XL Oti odi kĩ yaso foso ngbã kĩ bati avila ya ne Yesu sekẽ. Ekena akũ ade eke Yesu aduli kĩ ebumo ye a. Onyole a bi ye kĩ, “Nte awe ni, aapuli ofõ foso kĩ lewo ne yĩ akũ.”

XLI Ye foletsa ko Yesu konya, foesũ eyo awe eta ye. Ebi ye kĩ, “Mawe lomo. No akũ ekpale.”

XLII Deedimope foso a wo ne ye akũ.

XLIII Awã naa, Yesu bi ye kĩ edzakũ moatse enaa, leme esi ye mbla mo osĩ mo osĩ kĩ,

XLIV “Tafõ odza ne osi okabi bati letsa a kĩ de leya, mbom naa kpĩ, kakoa no akũ kanaatsa osofo. Boa afolie a kĩ Mose mbla tsa a, ayekĩ odi nye odi aanyi kĩ no akũ kpale.”

XLV Leme kĩ oti kĩ dzakũ a, enado foletsa a kagbamena awe, ekabi bati flee ayekĩ Yesu tsa ye a. Ne foesũ, Yesu tãpuli ebuki ewo ne omato odima kame, ade ekana ne tuwĩ kame a. Leme bati buki bekato kako nye kako kaya ne ye sekẽ.

## II

*Yesu Tsa Oti Odi Kĩ Eveliveli.*

I Fuwi fudi liti a, Yesu muniki enaa Kapernaum, ade owi tãbuna mo bati nu ye nkã kĩ eya ne toto kame a.

II Foesũ bati yayi toto a kĩ te kame edeĩ a mo kanya flee, ade ekatsa be Baguma foletsa a.

III Ade awã naa mo bati ena lo oti odi kĩ eveliveli bema ye a.

IV Kĩ betãpuli betsã onyukpẽ ne bati lidede sũ ni, bide ne kola ode benye oke ne kako kadi, ade bekena osone a mo okena biyi ne Yesu ane kame a.

V Kĩ Yesu mó be katekado sũ ni, ebi oti a kĩ eveliveli a kĩ, “Obi, bekɔa nɔ titikpa bite nɔ.”

VI Lemɛ Yudafɔ mbla batsanɛ a kĩ bɛna nɛ awã kakɔna nɛ be kamɛ kĩ,

VII “Nde sũ yalɛ fubusuotsa lɔmɔ? Baguma odi aapuli ekɔa titikpa ete.”

VIII Yesu nyi be kakɔna a foesũ ebi be kĩ, “Litsa sũ fukĩ aha mi nɛ mi kamɛ?

IX Fɔɔdabe deĩ osĩ fɔbɛ kĩ baabi oti kĩ eveliveli kĩ, ‘Bekɔa nɔ titikpa bite nɔ,’ iye kĩ, ‘Yidza, bɔɛ nɔ ɔkena katsã?’

X Kĩ míanyi kĩ Otidziwa Obi a deĩ kɔbɛ nɛ katinya kĩ kamɛ kĩ yakɔa bati titikpa kate sũ ni,” Yesu bi oti a kĩ eveliveli a kĩ,

XI “Yidza, bɔɛ nɔ ɔkena kanaa kɔla.”

XII Letaletɔ oti a yidza ɛbɔɛ ye ɔkena ɛnɛ nɛ bati a kĩ bɛdzɛ nɛ awã anɛ. Fɔtsa a kɛna bati a flee wãwã, ade bimu Baguma, bɛlɛ kĩ, “Botámɔ fɔtsa kĩ odu tɔ.”

### *Yesu Vɛ Levi Kĩ Eyatomɔ Ye.*

XIII Yesu buki ɛdzakũ ɛnaa Galilea ɔwɔ lutubu baũ abuĩ a. Bati pii ya nɛ ye sekɛ nɛ awã ade ɛtsa be Baguma foletsɔ a.

XIV Kĩ ɛdzakũ yanaa a ɛmó ɔgɔlɛ ɔtɛnɛ Levi, Alfeo obi kĩ edzi nɛ ɔgɔlɛ katekɔ. Ade Yesu bi ye kĩ, “Tomɔ yĩ.” Adeke Levi yidza ade etomɔ ye a.

XV Ke liti a, Yesu mɔ ye fɔtsa bakɔlɛnɛ a mɔ bati pii kĩ bitomɔ ye a naanya nɛ Levi awã. Tɔgɔlɛ batɛnɛ mɔ tokpa bakenanɛ pii lemɛ na nɛ kanyakɔ a mɔ be.

XVI Ade Farisifo kĩ benyɛ Yudafɔ mbla batsanɛ badi lemɛ na nɛ awã a. Kĩ Farisifo mbla batsanɛ a mó kĩ Yesu anya mɔ titikpa bakenanɛ mɔ tɔgɔlɛ batɛnɛ a, bivia ye fɔtsa bakɔlɛnɛ a kĩ, “Litsa sũ

yanya kamoa mo togole batene mo tokpa bebã bakenane?"

**XVII** Kĩ Yesu nu foletsa kĩ a, ebi be kĩ, "Bati kĩ bideĩ akũ osĩ tásĩ tutsonu okenane, mbom basone lisĩ ye. Ntáya kĩ mayaave bati kpĩĩ, mbom tokpa bakenane kave iya."

*Yesu Tsa Fotsa Ne Onukpẽ Kasui Akũ.*

**XVIII** Ne loko lidi kame, kĩ Yohanes mo ye fotsa bakolene mo Farisifo kasui onukpẽ a, bati badi ya ne Yesu sekẽ bivia ye kĩ, "Nde sũ no fotsa bakolene a lásui onukpẽ nde Yohanes bade mo Farisifo a aye?"

**XIX** Yesu kpa be mbuaye kĩ, "Mbode obolitsõ onyo bakoba aapuli bidzi kole ne obolitsõ kapikõ ne loko a kĩ obolitsõ onyo a deĩ ne be sekẽ a?"

**XX** Leme luwi lidi aaya kĩ baakpã ye ne ye bakoba a sekẽ, loko baasui onukpẽ ne fuwi a kame.

**XXI** Odima lako limakũ võe katae oke ne lima koe akũ. Limakũ võe a aabẽ loko lidomo akũ nte bevole de, ade fofõ oke baũ lewa eba ayekĩ fona koke a.

**XXII** Bio, odima lako waĩ võe kako ne oyae ovoli kuvũ koe kame, kitonekĩ waĩ võe aabẽ kuvũ koe a, loko waĩ a aawula, kuvũ a leme aabu kade. Mbom bakoa waĩ võe kako ne oyae ovoli kuvũ võe kame."

*Foletsa Kavia Ne Kaweya Luwi a Akũ.*

**XXIII** Ne Kaweya Luwi lidi akũ a, kĩ Yesu mo ye fotsa bakolene tsẽ batẽ ne fugbano koba kudi kame a, fotsa bakolene a kave fudi.

XXIV Foesũ Farisifo a bi Yesu kĩ, “Dã! Boe mbla tákpa osi kĩ bakena fukĩnaa ne Kaweya Luwi akũ.”

XXV-XXVI Awã naa Yesu via be kĩ, “Mitákã letsa a kĩ Legã Dawid kena a? Loko a kĩ kole ko ye mo bikĩ bitomo ye a, Dawid wo ne Baguma kola a kame a, ne loko a kĩ Abiata anya Yudafõ Jsofonokoẽ Flee a. Enanye afolibõ abodoo kĩ Yudafõ basofõ odi deĩ osi kĩ banya a enya, ade ekõa adi ekpa bikĩ bitomena ye a leme benya a.”

XXVII Yesu bi be kĩ, “Otidziwa sũ beboã Kaweya Luwi a, nné Kaweya Luwi a sũ beboã otidziwa.

XXVIII Foesũ Otidziwa Obi a nye Kaweya Luwi a Jlate.”

### III

*Yesu Tsa Oti Odi Kĩ Ye Awe Gogolo Ne Kaweya Luwi Akũ.*

I Ke liti a, Yesu buki enaa Yudafõ katsenakõ kadi. Oti odi kĩ ye kòkpo ku na ne awã.

II Loko a na Yesu bakesĩne badi na ne katsenakõ a, bekadã nte yaatsa oti a ne Kaweya Luwi akũ, ayekĩ baabõe foletsã ne ye akũ.

III Yesu ve oti a kĩ ye kòkpo ku a kĩ ene eyaadza ne bati a flee ane kame.

IV Ade edani etselamo bati a evia be kĩ, “Mbla kpa osi kĩ bekena tuwĩ ne Kaweya Luwi akũ, mbõee bekena tokpa? Fõnye luwi kĩ bate oti nkpa, mbõee kĩ befõne ye awe eku” Leme betále kadima.

V Yesu dã be etẽmena ne kalokpa kame, ade fõha ye paa ne be lolõ kame osĩ sũ a. Ade ebi osõne a kĩ, “Yo no awe.” Eyo awe a ade ye awe a de osĩ a.



VI Adeke Farisifo a dzakũ benamɔ Legã Herodes batomenane a, ade bipi adzuni ne Yesu kako akũ a.

*Yesu Tsa Bati Pii Ne Galilea Ɔwo Lutubu Baũ a Abuĩ.*

VII-VIII Yesu mɔ ye fotsa bakolene a naa Galilea Ɔwo lutubu baũ a abuĩ, ade bati beblebee tomɔ be beya a. Bito Galilea tite, Yudea tite, Yerusalem ɔmatɔ mɔ Idumea kamekame a, bikĩ bito Yordan Ɔwo liti a, mɔ be a kĩ bito Tiro mɔ Sidon tematɔ kamekame a beya. Bati kĩ flee ya ne Yesu sekẽ, kitonekĩ binu ye awãwã fotsa a kĩ etsẽ yakena a.

IX-X Yesu tsa bati pii ade basone pii kapili kĩ bata ye lokɔa bena akũ ɔsĩ a. Bati a lidede sũ ni, Yesu bi ye fotsa bakolene a kĩ bewe ɔkolɔ odi bedzela ye, ayekĩ bati a leláamenana ye.

XI Nte bati a kĩ hũhũ kpa na ne be kame sila bemó Yesu pe, batɔ ne ye abɔa kayɔ kabɔa fɔwɔla kĩ, “Nɔ nye Baguma Obi.”

XII Lemɛ Yesu sua be osi kĩ betafɔ bati linyi oti a kĩ ye yanɛ.

*Yesu Pau Fɔtɔ Banyane Ewua-nviã.*

XIII Ke liti a, Yesu de enaa ɔto kaletɛ. Ade awã ene bikĩ yawɛ kĩ benya ye bade a.

XIV Bati kĩ yakpɔta ne ye sekẽ ade epau be kame bati ewua-nviã, ete be dĩ kĩ fɔtɔ banyane. Ebi be kĩ, “Mpau mi kĩ mina ne yĩ akũ lokɔ nye lokɔ. Maado mi lemɛ kĩ minaale Baguma foletsɛ a,

XV ade míana kobẽ kĩ míablɔmena hũhũ kpa mitɔmena bati kame a.”

XVI-XIX Bati ewua-nviã a kĩ enye a buĩ nye Simon, ade ye Yesu te dĩ kĩ Petro, Yakobo mɔ

owaẽ Yohanes kĩ benye Zebedeo babi. Yesu ve be kĩ Boanerges, foe kayo nye kĩ bale kodzela mo kobẽ nde ayekĩ oplala akpẽne a. Babebã nye Andrea, Filipino, Bartolomeo, Mateo mo Toma, Yakobo kĩ enye Alfeo obi, Tadeo, Simon kĩ eto Kana kĩ epili ye kade loló a. Yuda Iskariot, oti kĩ ye lenye Yesu ekpa.

*Yudafó Mbla Batsane Vĩna Yesu.*

**XX** Yesu dzakũ ne awã enaa toto kame, ade bati pii buki beya ne be sekẽ ne awã. Ne foesũ Yesu mo ye fotsa bakolene a lãna aya benya malo.

**XXI** Kĩ Yesu akũ bati nu foe a, benaa kĩ bannaakpã ye, kitonekĩ bati kale kĩ, “Ye loló kame lamó kade kabu.”

**XXII** Yudafó mbla batsane a kĩ bito Yerusalem beya a le kĩ, “Hũhũ kpa deĩ ne ye kame. Hũhũ kpa legã a lekpa ye kobẽ yablomena hũhũ a katomena bati kame.”

**XXIII** Ade Yesu ve bati a eyamena ne ye sekẽ ele kodzela mo be ne fɔgbã kame kĩ, “Nde fóaya kĩ Abonsam aapuli eblomena ye moawe akũ etomena oti kame?”

**XXIV** Foe nfantuhũ nye kĩ nte legākanyakõ kadi sã ke akũ kutsu kutsu kĩ koano akũ ni, kanyakõ a na leláapuli kitim.

**XXV** Ade ayea nte kola kudi sã koe akũ kutsu kutsu mo tɛdze né ne be kame ni, kola na leláapuli kodza.

**XXVI** Foesũ nte Abonsam yidza edza ne ye moawe akũ, mo ye kanyakõ a sã kutsu kutsu ni, ye kanyakõ a aayale lokoa ade ye legã kanya a kawũna ne awã a.

XXVII “Odima leláapuli ewo ne oti kī edeĩ kobē kola kame enaafila ye fotsa, mboente enya loto esuli obelebe a fomɔ yaawo efila ye fotsa a.

XXVIII “Mabi mi ne onokɔali kame kī Baguma aakɔa bati tokpa tidi nye tidi kī bekena mo fubusuotsa fudi nye fudi kī bele ete be.

XXIX Lemε odi nye odi kī yaale fubusuotsa ne Hūhū Kpalewa a akū ni, Baguma leláakɔa ete ye da. Kitonekī ekena tokpa kī taawa daa.”

XXX Yesu le fukīi kitonekī Yudafɔ mbla batsanε a badi le kī hūhū kpa deĩ ne ye kame.

### *Bawei Liti Benye Yesu Akū Bati?*

XXXI Ke liti a, Yesu ɔma mo bawaēnyole ya bedzē ne kanya ade bido loto kī beve ye εya.

XXXII Bati a kī bidzi betsena Yesu a bi ye kī, “Dã, ama mo awaē amε dzē ne kanya bawe no!”

XXXIII Ade Yesu via be kī, “Owei nye mma? Bawei nye nwaē amε?”

XXXIV Kī edã bati a kī bidzi bisinya ye snake a, εle kī, “Midã, ade mma mo nwaē amε ne awī a!”

XXXV Odi nye odi kī yakena ne Baguma kawε akū ni, ade ye nye nwaēnyole mo nwaētsole, mo mma a.”

## IV

### *Yesu Bɔa Legbã Ne Funitsã Babi Kasã Akū*

<sup>1</sup> Yesu buki enaa Galilea ɔwo lutubu baũ a ɔwē, ade ekatsa Baguma foletsa a. Ayekī bati pii foli ne ye akū sū ni, ewo edzi ne ɔkolo kī eteĩ ne mui anε kame. Bati dza ne ɔwo lutubu baũ a abuĩ ade Yesu katsa be fotsa ne fogbã kame a.

II Loko pii ne ye fotsa katsa kame a, ekwa fōgbā etsa fotsa a kī yawe kī etsa be a. Fotsa a kī etsa be a nye fukī.

III Ebi be kī, “Mitse! Luwi a onyole odi naa kōba enaasā funitsā babi.

IV Kī ekasā foe a fudi tō ne osi ɔwē, ade kɔvɔlabi yafila be bemenā a.

V Badi tō ne lekpakpalabode akū, kī tite lelāa pii. Foesū babi a me moatse.

VI Leme kī suwa ta kpaa pe beve biku, kitonekī be tunu tána funitsā, ne boe a sū.

VII Badi tō ne tuwī mō fu nde ɔgoabi kame. Tuwī mō fu me fusuli be, kī betápuli bibo ane. Ne foesū betáwū babi.

VIII Babi badi tō ne tite wī akū. Beme bibo ane, ade biwū bido babi a. Badi do babi taale, badi aduesia, badi oha.”

IX Ne kawūnakō a Yesu bi be kī, “Oti kī edeĩ ato ni, etse katse wī!”

*Yesu Nye Legbā a Kayo Etsa Ye Fotsa Bakolene.*

X Kī Yesu odi na ne kaka mōa a, bati a kī binu ye legbā a mō ye fotsa bakolene mō ye foto banyane a ya kī enye de kayo etsa be.

XI Yesu bi be kī, “Baguma nye ye legākanya kame fotsa kolawa a etsa mi. Leme bati a kī bite a ni, mboente fōgbā kame baakanu foletsa a.

XII Foesū fōaya ne foe kame nde ayekī Baguma onukpē banyene kame odi tsele eyi kī, ‘Baakadā, leme beláamō biyi ɔsū.

Baakatse leme beláanu foe kayo.

Kitonekī tito kī banu iye bamō malo ni,

beláanu kayo mō

baadani bedā Baguma,

lókɔa ekɔa be titikpa ete be.' "

**XIII** Ade Yesu via be kī, "Nte mitánu legbã kīi kayɔ a, nde miákɛna fɔmɔ míanu fɔgbã bebã kayɔ?"

**XIV** Fɔtsa odune a nye oti kī etsẽ yale Baguma kale.

**XV** Bati badi la nde babi a kī betɔ ne osi ɔwẽ a. Nte binu pe lókɔa Abonsam yanye foe ne be fɔlɔ kame.

**XVI** Bati badi leme la nde babi a kī betɔ ne boe kame. Nte lókɔ a kī binu pe lókɔa kawɔle de be.

**XVII** Leme kale a ke tunu láwo ne tite kame kawo wī. Be katɛkado adã lukū. Nte bati liti katomɛna yawo ne kale kīi akū pe, baamuniki ne ke liti.

**XVIII** "Ade bati badi leme la nde babi kī betɔ ne tuwī mɔ fu kame a. Be benye bati kī binu Baguma fɔletsɔ a,

**XIX** leme katinya kame ɔhau, sika kawɛ mɔ sukɛna fɔwetsɔ yi be tɔwɔle kame. Fɔtsa kīi mɛna Baguma fɔletsɔ a, foesū fɔáwū babi.

**XX** "Bati badi leme atɛ Baguma Kale a nde babi kī betɔ ne tite wī akū. Bati kīi tɛ ke mɔ be ɔwɔle flee. Luwi nye luwi, babo anɛ kanɛ lolɔ kawū babi beblebee. Bekɛna nde fudutsɔ a kī fɔawū babi taalɛ, ãye aduesia, ãye ɔha mɔa."

### *Ɔsedza Lɛkɛnawa Nye Kī Yakpale Fɔkɔ.*

**XXI** Yesu buki evia be kī, "Owei atɛna ɔsedza kakɔa lɔɔda katsa ye ãye kakɔa ye kado ne mpa kayɔ? Nné ɔsedza otse akū bakɔa ye kate?"

**XXII** Letsa nye letsɔ kī bekɔa bekɔla a baanye de kanya, ade Baguma aabinya letsɔ nye letsɔ kī bisua a.

**XXIII** Foesū nte mideĩ atɔ ni, mitse foe katse wī!"

XXIV Bio, Yesu bi be kī, “Miyi ato yededeede mitse letsa a kī mianu a. Kitonekī fotsa kakona odu a kī mikōa mikōna mikpa bati bebā a, ade foe odu Baguma leme aakōa ekōna ekpa mi a.

XXV Bikī bekōa be akū bekpa yī fotsa katsa a baakpa be kayōkanu dzununuunu. Leme bikī baátse a ni, baate letsa a kī bideĩ a malo ne be awe.”

*Yesu Le Kale Ne Kamone Libi Ane Kabo Akū.*

XXVI Yesu buki ebi be kī, “Baguma legākanyakō a la nde oti kī yasā kamone.

XXVII Luwi daa kī yawa kayidza, ade babi a ame kabo ane. Leme enyina ayekī fotsa a akena kabo ane.

XXVIII Tite afō fudutsa ale ne foe akū akū. Lanya loto lokōa lenye toota fomō kutse a ane. Nte kubo ane kōawū babi beblebee.

XXIX Nte babi a yōole a banena be, kitonekī kōba funitsā kākōta lokō wo oto.”

*Legbā Ne Kutse Libi Kabii Akū.*

XXX Yesu via kī, “Litsa bōakōa bōkonamō Baguma legākanyakō a? Legbā lewōdabe makōa inye kayō ntsa?

XXXI Fōla nde kutse libi kabii ne katinya kame flee kī oti bōe enadu.

XXXII Kutse kī yapō kōkena futse baū a kame kōmōa ne kōba kame. Kōane tenane pii ade kōakpa ōna a. Kōvolabi akena fōtsōe ne koe kame.”

XXXIII Yesu bi be Baguma fōletsā a ne fōgbā kame ne be kapuli kanu kayō onukpē.

XXXIV Yaábi be kadima keba fɔgbã kame. Nte bemɔ ye fɔtsa bakɔlene a odi bidzi a, lɔkɔa yanyɛ foe kayɔ katsa be.

*Yesu Fɔ Ɔwe Kobɛ Onukpɛ Do.*

XXXV Luwi a ke olobe a, Yesu ve ye fɔtsa bakɔlene a ele kɔ, “Mifɔ bunyina ɔwɔ lutubu baũ a bɔnaa de abuĩ atide a.”

XXXVI Foesũ befɔne bati a biwo ne ɔkɔlo kame. Yesu nawo ekena akũ edzi, ade biyi ɔwɔ a kanyina kayɔ a. Tɔkɔlo bebã lemɛ na ne mui a akũ.

XXXVII Owi tábuna ɔwe kpale odi do kavũ awe, ebɔa mui eko ne ɔkɔlo a kame. Ɔkɔlo a ka kɔlaa kɔ kite sukuloo kufe yayi mɔ mui eyela.

XXXVIII Lɔkɔ a na kame a, Yesu wa ne ɔkɔlo a liti. Ekɔa sumuye ete lɔlo elamena tida kawa. Ye fɔtsa bakɔlene a nadzela ye ade bibi ye kɔ, “Fɔtsa Ɔtsane, fɔtséla nɔ kɔ bɔwɔ buyua?”

XXXIX Kɔ Yesu yidza edza a, ade ewũni kɔ, “Ɔwe, fɔ kavũ!” Ebi mui a lemɛ kɔ, “Mui, kena dɔĩ.” Ɔwe a fɔ kavũ ade mui a anɛ flee kena dɔĩ a.

XL Yesu via ye fɔtsa bakɔlene a kɔ, “Nde sũ libe wo mi lɔmɔ? Mitáte yĩ mido?”

XLI Ne libe a kɔ libuki liwo be a sũ ni, bekavia be akũ kɔ, “Owei koũ nye oti kɔĩ? Mui mɔ ɔwe malo atse ye kale!”

## V

*Yesu Blɔmena Hũhũ Kpa Etomena Onyole Odi Kame.*

<sup>1</sup> Ke liti a, Yesu mɔ ye fɔtsa bakɔlene a naa Galilea lutubu baũ seke kɔ a ne Gerasefo tite akũ.

II Kĩ Yesu ne ne okolo kame a, onyole odi kĩ hũhũ kpa deĩ ne ye kame ne eto asie eyatselamo ye.

III Onyole kĩ kadzikõ nye asie a kĩ efuã ne awã. Bati a flee lápuli kapi ye kado ne nkosonkosõ kame.

IV Lokõ nye lokõ kĩ basuli ye akpõ mõ abõa ni, yaveli nkosonkosõ a kĩ tipini ye a. Oti kĩ deĩ kobẽ kudi odu kĩ odima lápuli kapi ye.

V Lenye mõ suwa flee yamini ne asie mõ toto kame. Etsẽ yabõa fowõla lokõa yakõa boe kakpeli ye akũ.

VI Onyole kĩ dzẽ mõ lugo fomõ emõ Yesu. Foesũ ewula atse enake aduli ne Yesu nnye.

VII Ade ebõa fowõla kõõba ele kĩ, “Yesu, Baguma Ne Ode Flee Obi! Bõake nõ aduli, ne Baguma sũ, tunõ kĩ oláavele yĩ soto!”

VIII Ele foe lomõ kitonekĩ enu kĩ Yesu kale kĩ, “Hũhũ kpa, né ne oti kĩ kame!”

IX Yesu via ye kĩ, “Nde bave nõ?”

Awã naa ele kĩ, “Bave yĩ lidede, kitonekĩ boe a kĩ budeĩ ne onyole kĩ kame a bõronẽ!”

X Ade awã ebuki eke Yesu aduli mõ õĩ mõ õĩ kĩ etablomena be enemena ne tite a na kame a.

XI Lokõ a na kame a, baplakuo pii dzẽ bade ne katobii kayõ.

XII Ade bike Yesu aduli kĩ, “Blomena boe bõnaawo ne baplakuo a kĩ bedzẽ ne akĩ a kame.”

XIII Ekpa be osi ade hũhũ a né ne onyole a kame benawo ne baplakuo kame a. Baplakuo a flee kĩ baawo nde mpim nviã, lo atse kplikplikpli beka kakpenii a, benawo ne owõ a kame ade be flee bemõa mui biku a.



XIV Bati a kī badāmēna be akū a wula atse benaa omato a mo tikī tifuā a kamε, benale letsa flee a kī leya a. Bati wula atse benaa awā kī banaadā letsa a kī leya a.

XV Kī biwo Yesu sekē a, bemo oti a kī hūhū kpa beblebee na ne ye kamε a ne awā. Ekēna akū edzi ade edo atadie a, ye anε kamε lemε kpale. Libe wo bati a flee!

XVI Bikī benya loto bemo foe a, le letsa a kī leya ne onyole a mo baplakuo a akū.

XVII Foesū bike Yesu aduli kī edzakū ne be tite akū.

XVIII Kī Yesu awo ne okolo kamε a, onyole a kī hūhū kpa na ne ye kamε a ke ye aduli kī, “Fō ntomo no bonaa!”

XIX Lemε Yesu tátunō. Mbom ebi ye kī, “Naa kola ne no bati sekē, loka kabi be letsa a kī Olate a kēna ekpa nō, mo ayekī emō no konya a.”

XX Foesū onyole kī naa enamini ne temato ewua kamεkamε a, ade ebi be foletsa flee a kī Yesu kēna ekpa ye a. Fokēna bikī binu foe a saa.

*Yesu Tsa Yairo Kī Enye Yudafō Onokōē Obitsole Mo Otsole Osone Odi.*

XXI Yesu buki edani enaa lutubu baū a sekē kī a. Kī ewo de abuī a, bati pii yayi ye akū.

XXII Onyole odi ne Yudafō katsenakō banokōē a kamε omōa kī have Yairo ya ne awā. Kī emō Yesu a, ekēna akū ekpa ye.

XXIII Ade ebi ye mo kudulike kī, “Yī obitsole kabii kī kete futeli ewua-nviā aso mo osī mo osī. Foesū ya kayate awe ne ye akū loka yaana akū osī edzi nkpā.”

XXIV Ade Yesu yidza etomo ye a.

Ne ayekĩ bati a kĩ bitomɔ Yesu pɔne sũ, ena ne be kayite kĩ banaa.

**XXV-XXVI** Otsole odi kĩ babɔane kawula ne ye akũ futeli ewua-nviã flee mɔ lubo kamɔ paa, tito kĩ bawane kadã ye a malo na ne be kame. Ebula sika flee kade ne fɔso kĩĩ katsa akũ, leme fɔso a tãdo ye, mbom kade fokade ne ode.

**XXVII** Enu Yesu nkã foesũ ena ne bati a kĩ bitomɔ Yesu ne liti a kame.

**XXVIII** Ade ebi ye akũ kĩ, “Nte maapuli nta tito ye atadie malo ni, kufe maasa.”

**XXIX** Kĩ eta Yesu atadie a, ade akũ fɔ ye kawula deedimɔape a. Emó eyi ɔsũ ne ye kame kĩ esae ade ene ne ye lubo kamɔ kame a.

**XXX** Letaletta Yesu nyi kĩ kobẽ kudi né ne ye kame. Foesũ efɔ edza, edani evia bati a kĩ bitomɔ ye a kĩ, “Owei nye ekĩ eta yĩ atadie?”

**XXXI** Ye fɔtsa bakɔlene a bi ye kĩ, “Dã ayekĩ bati beblebee sinya nɔ. Nde sũ avia kĩ owei leta nɔ?”

**XXXII** Leme Yesu dzemena ane kako kadã kĩ yaamɔ oti a kĩ ye leta ye a.

**XXXIII** Otsole a mó letsa a kĩ leya ne ye akũ. Foesũ ne libe mɔ kukũtila kame ni, ene eyake aduli ne Yesu ane kame. Ebi ye letsa a kĩ leya a yededeede.

**XXXIV** Yesu bi ye kĩ, “Yĩ obitsole, nɔ katokado fɔ ɔsae. Naa ne lukudɔ kame. Nɔ lubo kamɔ a lelãabuki leya ne nɔ akũ dadaada.”

**XXXV** Lokɔ a kĩ Yesu kale fukĩ a, batɔ to Yairo awã beyabi ye kĩ, “Nɔ obi a ku kɔkɔe. Nde sũ obuki aha fɔtsa ɔtsane kĩ?”

**XXXVI** Yesu tátse be kale a, mbom ebi Yairo kĩ, “Tavila, nɔ kɔ te kado.”

XXXVII Yesu kpã Petro, Yakobo mo owaẽ Yohanes be odi benaa Yairo awã.

XXXVIII Kĩ biwo toto a kame a, ade kĩ Yesu mó ayekĩ bati dzẽ mo konya mo fowola a,

XXXIX ewo ne be kame, evia be kĩ, “Litsa tsẽmo fowola kĩ odu? Nde sũ miabe? Kabisẽẽ kĩ táku. Tida kawa!”

XL Kĩ ele foe lomo pe, bati a kĩ bedzẽ ne awã támo ye kameme.

Ade Yesu fõ benye bati a flee benaa kanya, ade efõ kabisẽẽ a olega mo oma mo ye fotsa bakolene elale a biwo ne awã kĩ onokpa a waa a.

XLI Yesu pi ye ne kokpo ade ebi ye kĩ, “Talita koumu!” Foe kayo ne tide a kame nye kĩ, “Kayitsõbi kabii, mabi no kĩ yidza!”

XLII Deedimopape katsolebi kĩ yidza kedza ade kido kato katẽ awe a. Kĩ foya lomo a, fokena be a flee wãwã.

XLIII Lemẽ Yesu si be mbla mo osĩ kĩ betabi odima kadimano. Ebuki ebi be kĩ, “Mikpa ke litsedi kenya.”

## VI

### *Nazareto Sĩ Yesu.*

I Yesu dzakũ ne awã ade bemo ye fotsa bakolene a benaa omato a kĩ ye kame bedoola ye a.

II Ne Kaweya Luwi a akũ a, enatsa Baguma folets a ne katsenakõ a. Ye omato bati pii yatse ye fotsa katsa, ade fokena be saa a.

Bivia be akũ kĩ, “Ndia oti kĩ kole fotsa kĩ odu etomena? Kadikanyi mo kobẽ wodabe bekpa ye sũ mo epuli yakena awãwã fotsa kĩ odu?”

III Mbɔɛɛ nné Maria obi kī yame fɔtsa a yane? Ñye nné bawaɛnyole nye Yakobo, Yose, Yuda mo Simon? Miádã! Nné bawaɛtsole leme ne awĩ a?" Foesũ bati kī sī ye kate kado.

IV Yesu bi be kī, "Baguma onukpě ɔnyene te dī ne kako nye kako, leme ne ye moawe ɔmato, mo ye moawe bati kame ni, elá dī wĩ lidima."

V-VI Ne ayekī ye ɔto bati táte ye bido sũ ni, foletsa a nyene Yesu akũ. Fɔtsě foe akũ sũ étápuli ekena awāwā fɔtsa pii ne awā, keba kī ete awe ne basone badi akũ, ade be foso a do be a.

*Yesu Do Fɔtsa Bakolene Ewua-nviã a Fɔto.*

Ke liti a leme, Yesu mini ne tukula mo foko a kī fufuã awā, ade ekatsa Baguma foletsa wĩ a.

VII Ene ye fɔtsa bakolene ewua-nviã a ekpota, ade edo be nviã nviã a. Ekpa be kobě kī konya hũhũ kpa flee akũ.

VIII Esi be mbla kī, "Odima etabɔe letsama ele ne ye osi akũ, mbɔente otse kī bake katsã odi. Mitale funitsã ñye kuvũ nde ayekī fɔtsa bawãne ale a. Mitabɔe sika mile ne mi fuvũ kame.

IX Mido mi tepambua, leme mitabɔe tilima bebã mibumena letsa a kī mido a."

X Ebuki ele kī, "Awā kī míase a ni, mina ne awā kenaawo loko a kī miádzakũ.

XI Awā kī bati táte mi ni, mine ne ɔmato a kame lokoa mikpa mi aboa kudu miko ne be akũ, fonya nsentseleni fokpa be kī Baguma aavele be ɔto."

XII Fɔtsa bakolene ewua-nviã kī mini betsa Baguma foletsa wĩ a kī odi nye odi edani ɔwole kame.

XIII Beblomena hũhũ kpa pii bitomena bati kame. Betsela basone kugua ade betsa be a.

*Legã Herodes Fõ Bitsua Yohanes Mui Ɔwɔlanɛ a Lɔlɔ.*

**XIV** Lɔkɔ kɩ̃, Legã Herodes kanu lɛkenawa wĩ a flee kitonɛkĩ Yesu dĩ gba nɛ kakɔ nyɛ kakɔ. Bati badi kale kĩ, “Yohanes, Mui Ɔwɔlanɛ a, liyidza ebuki eto kanɔkpa ɛya! Ade foesũ edeĩ kobẽ yakena awãwã fotsa a!”

**XV** Badi lɛmɛ lɛ kĩ, “Baguma Onukpẽ Ɔnyɛnɛ Eliya yanɛ.”

Babebã lɛmɛ lɛ kĩ, “Baguma onukpẽ banyɛnɛ kɔɛ a kamɛ odi yanɛ.”

**XVI** Lɛmɛ lɔkɔ a kĩ Legã Herodes nu fɔletsɔ kĩ a ye malo ɛlɛ kĩ, “Yohanes a kĩ nfõ bitsua ye lɔlɔ a, ade ye liyidza ebuki edzi nkpã a.”

**XVII** Lɔkɔ lidi kamɛ ni, Legã Herodes mɔawɛ lɛfõ bipi Yohanes ade ke ɛfõ bisuli ye mɔ tɔwẽ bɛkɔa bido nɛ kɔla kĩ bado tɔkpa bakɛnanɛ a kamɛ a. Legã Herodes kɛna fukĩ kitonɛkĩ Herodia kĩ ɛkɔã a nya ɔwaẽ Filipino ɔtsõ.

**XVIII** Yohanes kabi Herodes kĩ, “Ketáfeta kĩ atɛ awaẽ ɔtsõ ɔkɔã.”

**XIX** Foesũ Yohanes fɔletsɔ a wo Herodia kalɔɛ, ade ebɔɛ ye likesĩ a. Ɛwɛ kĩ yakɔ ye lɛmɛ ɛlápuli ɛkɛna fukĩ nɛ Legã Herodes liti.

**XX** Kitonɛkĩ Legã Herodes avila Yohanes, ade enyina kĩ Yohanes nyɛ oti wĩ kĩ ye akũ kpale. Ɛkana kɔneyi nɛ ye akũ. Yawɛ katse ye fotsa katsa a katse fɔkɔ fudi, titɔ kĩ ye fɔletsɔ awɛ ye ɔwɔlɛ kaha nɛɛ enu foe.

**XXI** Ke kawũna a, osi yabinya ɛkpa Herodia. Luwi a nya Legã Herodes lɛmawi. Legã Herodes vɛ banɔkɔẽ banɔkɔẽ nɛ ye lɛgãkanyakõ, sodzafɔ

banokõẽ mɔ banokõẽ nɛ Galilea tite akũ beya nɛ kanyakõ a.

**XXII** Herodia obi oyitsõ ya eyato edo Legã Herodes mɔ ye bakɔba a kawɔle paa nɛ kanyakõ a.

Foesũ Legã Herodes via oyitsõ a kĩ, “Litsa awɛ kĩ nkpa nɔ?”

**XXIII** Elo fubo ele kĩ, “Letsa nye letsa kĩ aavia yĩ ni, maakpa nɔ, nte fɔanya yĩ legãkanyakõ a seke malo!”

**XXIV** Foesũ oyitsõ kĩ nɛ enavia ɔma kĩ, “Litsa nvia?”

Ade ɔma bi ye kĩ, “Via Yohanes, mui ɔwɔlanɛ a, lolɔ.”

**XXV** Oyitsõ a wɛ sɔwa enaa kɔla a kame, ade ebi Legã Herodes kĩ, “Mawɛ kĩ tsua Yohanes Mui ɔwɔlanɛ a lolɔ kate nɛ tsensi akũ kakpa yĩ finyaa finyaakĩ.”

**XXVI** Fukĩ wo Legã Herodes kalɔɛ paa lemɛ eláapuli edani ye semɛ nɛ fubo a kĩ elo nɛ banokõẽ banokõẽ anɛ sũ.

**XXVII** Foesũ awã naa edo ye ɔblafɔ kĩ enaatsua Yohanes lolɔ eyamɛna. ɔblafɔ a natsua naa kɔla kĩ bado bati a enatsua Yohanes lolɔ.

**XXVIII** Ekɔa lolɔ a ete nɛ tsensi akũ ade ekɔa ɛma oyitsõ a. Ye malo ete ekɔa de ɛma ɔma.

**XXIX** Kĩ Yohanes fɔtsa bakɔlenɛ a nu fɔletsɔ a, benaa benabɔɛ ye ɔnokpa a benabila.

### *Yesu Kpa Bati Mpim Elo Funitsã.*

**XXX** Fɔtɔ banyanɛ a kĩ Yesu do kĩ mini nɛ fɔkɔ a kĩ fufuã buki bimuniki, ade bibi ye fɔtsa flee a kĩ bekɛna, fɔtsa a kĩ betsa mɔ fɔtsa a kĩ fɔya nɛ be osi akũ a.

XXXI Awā kī Yesu mō be bēna a bati a yapō lidede, bikī anaa ni bikī aya, foesū betána osi mō banya malo. Ade Yesu bi be kī, “Mifō boe odi bōnaa awā kī kadā dīi bōnaaweya sukuloo.”

XXXII Biwo ne okolo kame kī banaa awā kī bati lelāa.

XXXIII Lemē kī banaa a, bati pii mō be biyi osū, ade ke biwula atse benya be loto biwo awā fomō Yesu mō ye fōtsa bakolene a nawo awā.

XXXIV Kī Yesu né ne okolo a kame a, emō bati beblebee. Be akū kō ye kōnya kitonekī bekēna nde baveli kī belá okpāne. Foesū eyi kayō mō be Baguma fōletsa katsa.

XXXV Kī olobe wo oto a, ye fōtsa bakolene a ya beyabi ye kī, “Kade dō kiyua. Ayekī awī la a belāana letsama benya.

XXXVI Foesū kpa be osi bedzakū, lokoa nte biwo temato a mō tukula kame a, baana litsedi beya benya.”

XXXVII Yesu bi be kī, “Mi mōawe a miwe litsedi mikpa be benya.”

Bekpa mbuaye kī, “Be kanya aate nde oti mōa tideto elē kotokase. Awe kī bubula sika kade ne be kanya odi sū?”

XXXVIII Ade ke Yesu via be kī, “Abodoo eni minee? Minaa minaadā.”

Kī benadā a bibi ye kī, “Abodoo elo mō kōfōabi nviā pe deī.”

XXXIX Yesu bi ye fōtsa bakolene a kī befō bati a flee bidzi ne kutsu kutsu kame ne tuwī blōblo akū.

XL Bati a flee sē bidzi ne kutsu kutsu kame. Kutsu kudi aawo nde bati oha, kudi lemē aawo nde aduenum.

**XLI** Yesu bɔɛ abodoo elo mɔ kɔfɔabi nviã a ade kī edã odetó kame fɛɛ a, ɛnye Baguma kɔɛ ade ɛyeɛ abodoo a. Ekɔa foe ekpa ye fɔtsa bakɔɛɛ a kī besẽ bekpa kutsu a flee. Ade ekɛna kɔfɔabi a lɛmɛ lɔmɔ a.

**XLII** Bati a flee nya biwĩ.

**XLIII** Kī ye fɔtsa bakɔɛɛ a fila funitsã a kī fute bekpɔta a, fuyi kɔba tetsetse ewua-nviã.

**XLIV** Ade bati a kī benya funitsã a banyole nɛɛ odi lidede wo mpim elo.

*Yesu Tsã Nɛ Mui Anɛ.*

**XLV** Awã naa Yesu fɔ ye fɔtsa bakɔɛɛ a wo nɛ ɔkɔɔ kame kī benaa ɔmatɔ kī bave Betsaida nɛ lutubu baũ sekẽ kī a. Efɔ bati beblebee a lɛmɛ pansam.

**XLVI** Ke liti a, ye malo ede enaa ɔtɔ kaletɛ enabɔa mpaɛ.

**XLVII** Ke lɛnye a, ɔkɔɔ a wo ɔwo lutubu baũ a kayite, ade kite Yesu odi nɛ awã a.

**XLVIII** Emó kī kekapiã ye bati a mɔ ɔkɔɔ a kahali, kitonɛkī ɔwe kavũ katsɛlamɔ be. Foesũ fɔmɔ ɔnɔɛ tɔdɔũ elo aabɔa a, Yesu tsã mui anɛ enaa be sekẽ. Kī efuã be a, ekɛna ndɛ yatẽ be,

**XLIX** ade bebɔa fɔwɔla kī, “Ɔnɔkpa yanɛ!”

**L** Libe wo be flee.

Lɛmɛ letaleta Yesu lɛmɔ be kɔdzɛla kī, “Mitavila! Yĩ manɛ. Mina ɔwɔɛ!”

**LI** Ewo nɛ be sekẽ nɛ ɔkɔɔ a kame, ade ɔwe a fɔ kavũ a. Fukĩ fɔ ye fɔtsa bakɔɛɛ a kɛna saa,

**LII** kitonɛkī betányi ayekĩ fɔkɛna fɔmɔ ekpa bati mpim elo funitsã benya bitina. Be kakɔna nɛ fukĩ akũ malo tákpale, foesũ betáte bido.

*Yesu Tsa Basɔɛ Nɛ Genezaret Tite Akũ.*



LIII Kĩ biwo ɔwo lutubu baũ a seke sitide a, biduma ne Genezaret. Ade awã bebla be ɔkolo bedzela a.

LIV Mo be kane ne ɔkolo a kame pe bati mo Yesu biyi ɔsũ.

LV Foesũ biwula atse benakpa kanyi ne be tite flee akũ. Awã kĩ binu kĩ Yesu na a, belo basone bema ye.

LVI Ade kako nye kako kĩ Yesu tsã, nte ɔmato kame o-o, ñye akula kame o-o, bati kayamena basone ne kɔyaato ade bekawã ye kĩ efɔ beta ye atadie ato. Bikĩ beta ye a na akũ ɔsĩ.

## VII

*Yesu Le Kĩ Benne Batidziwa Amanie Batsa Fɔtsa.*

I Farisifo mo Yudafo mbla batsane badi to Yerusalem beyatsena ne Yesu sekẽ.

II Bemó kĩ ye fɔtsa bakolene a dzi banya, ade badi távole awe nde ayekĩ be Farisifo betsa bati kĩ bekaakena a.

III Biyi foe ɔsũ kitonekĩ Farisifo a mo Yudafo a flee tomo be bawanyo amanie a kĩ bekoa biyi be a. Foesũ nte betávole awe kavole wĩ ni, baánya.

IV Nte beya litsedi bitomena kɔyaato malo, kene kĩ bavole awe fomó banya. Bitomena mbla kumekume leme kĩ bibo ane beyamo a, nde kuyei, fɔtsa mo fugumi kavole.

V Foesũ Farisifo mo Yudafo mbla batsane a via Yesu kĩ, “Nde sũ bikĩ bitomena no a lákena ne boe bawanyo amanie akũ? Ade nte banya malo baávole awe!”

VI Yesu kpa mbuaye kĩ, “Mi ane kame keke fɔtsa bakenane! Fɔletsa a kĩ Baguma Onukpẽ ɔnyene

Yesaya ɛ nɛ mi akũ a ya nɛ foe kame pɛpɛpɛ.  
Baguma ɛ kĩ,

‘Bati kĩĩ asum yĩ mɔ onukpɛ kame fɔlets  
menemene odi,  
ɛmɛ be towɔɛ deĩ lugo nɛ yĩ sekɛ.

**VII** Pupulidza basum yĩ,  
kitonekĩ batsa batidziwa mbla nɛ Baguma  
mbla a kadokõ.’

**VIII** Fɔatsa kĩ bekɔa yĩ mbla biyi nɛ ɔwɛ ade  
bekɔa batidziwa amanie a batsa a!”

**IX** Yesu bi be kĩ, “Mideĩ tedake tidi kĩ mitomɛna  
ade mikɔa Baguma mbla miyi nɛ ɔwɛ nɛ ayekĩ  
miakɛna nɛ mi bawanyɔ amanie akũ sũ.

**X** Foesũ Baguma Onukpɛ Ōnyene Mose tseɛ eyi  
kĩ, ‘Bu aga mɔ ama.’ Ade ebuki ɛɛ kĩ, ‘Odi nye  
odi kĩ edumu ɔɛga ãye ɔma ni, kene kĩ bekɔ ye.’

**XI** ɛmɛ miatsa kĩ nte odi deĩ litsedi kĩ yaakɔa  
ebumɔ ye bamane ni, yaapuli ɛɛ kĩ ɛkɔa foe eyi  
lite nde fɔtsa kpalewa ɛkpa Baguma lokɔa fɔatsa  
kĩ owula kɔa fɔtsa tewa a eyi kĩ yaabɔa afolie  
ɛkpa Baguma.

**XII** Ade ke mitákpa ye osi malo kĩ yabumɛna ye  
bamane a mɔ fɔtsa tewa a!

**XIII** Ade aye mikɔa mi bawanyɔ amanie mibula  
Baguma mbla kade a. Miakɛna fɔtsa bebã nde  
fukĩĩ odu.”

*Fɔtsa Kĩ Fɔato Oti Ōwɔɛ Kame Ni, Ade Foe  
Ado Ye Efĩ a.*

**XIV** Ke liti a, Yesu buki ɛve bati a flee ɛkpɔta nɛ  
ye sekɛ. Ebi be kĩ,

**XV** “Letsa nye letsa kĩ oti nya mɔ fuwo nɛ ye  
kame ni, fɔádo ye efĩ nɛ Baguma anɛ. Mbom

letsa kī lato oti ɔwɔɛ kame a, ade foe ado ye efĩ a.

**XVI** Mi flee miyi ato mitse katse wī.”

**XVII** Kī edzakū ne be sekē enaa kola a, ye fɔtsa bakɔɛne a via ye kī enye legbā a kayo etsa be.

**XVIII** Yesu bi be kī, “Nte mitánu kale kīi kayo kekō mi adzuni leláapuli epi letsama. Fɔwaa yedede kī letsa kī lawo ne oti kame ni, foádo ye efĩ.

**XIX** Kitonekī fɔtáwo ne ye ɔwɔɛ kame. Mbom fɔnaa ye seme kame, ade fɔtsa ye kame fone nde fɔtsa kpa a.” Letsa a kī Yesu le ne awī tsa kī funitsā fudi nye fudi nene fɔkpa kanya.

**XX** Ebuki ele enamena loto kī, “Letsa a kī lanɛ kato oti ɔwɔɛ kame ni, ade foe ado ye efĩ a.

**XXI** Kitonekī oti ɔwɔɛ kame tokpa kakona ato, tokpa a tidi nye linyolewe mo litsolewe, kaye, oti kako, konyo mo kotsō liti kanɛ,

**XXII** ane ngbā, ablo kakena, fɔvā kama, sukena fowetsa kī fonene, likesī, fɔvā kama kate ne bati akū, lukūta mo kadzi ne tidzimbi kame.

**XXIII** Fɔtsa kīi flee to oti kame ade foe ado ye efĩ a.”

### *Otsole Odi Kī Enyé Yudani Tɛ Yesu Edo.*

**XXIV** Yesu dzakū enaa tite a kī tifuā ɔmato kī bave Tiro a kame. Ewo ne toto tidi kame. Etáwe kī odima enyi kī edeī ne awā, leme etápuli ekola ye akū.

**XXV** Otsole odi kī hūhū kpa deī ne ye obi kame nu kī Yesu na ne awā, ade eya eyake aduli ne ye anɛ kame a.

**XXVI** Otsole kīi nye ɔnoɔē kī bemɔ Yudafɔ baákā. Enye Foenikeni kī eto Siria tite akū. Eke

Yesu aduli kī eblomena hūhū kpa a etomena obitsole kame.

XXVII Leme Yesu bi ye kī, “Fō bekpa babisē funitsā tō. Fōnéne kī bakoa babisē funitsā bekpa bakpete.”

XXVIII Awā naa otsole a kpa mbuaye kī, “Awoo, boe Ōlega, leme bakpete a kī bikoni ne kanyakō a ana osi kanya babisē funitsā a kī fuwuli fuko ne tite a.”

XXIX Yesu bi ye kī, “Ne letsa a kī oḷe ne awī sū ni, kaanaa kōla. Aamō kī hūhū kpa a né ne nō obitsole a kame.”

XXX Otsole kī naa kōla, ade emō kī obi a waa ne okena akū, lokoa hūhū kpa a ne ne ye kame.

*Yesu Tsa Oti Kī Enye Ōtōsīne Mō Omumu.*

XXXI Kī Yesu dzakū ne Tiro kayite a ade etsā Sidon omato a kame a, etsā Galilea owo lutubu baū abuī, enaa temato ewua a kamekame a.

XXXII Ne awā a, bati badi yamena odi kī esī ato ade enye omumu leme a. Bike ye aduli kī ete awe ne ye akū.

XXXIII Foesū Yesu kpā ye enamena oowē, ade ekoa bawobi edo ne ye ato kame a, ade etua tane leme ete ne lawobi akū ekoa ekputa onyole a seme a.

XXXIV Ade Yesu dzela ane edā ode, eweya eke fee ade ebi onyole a kī, “Hefata,” foe kayo nye kī, “Binya!”

XXXV Deedimōape onyole a ato binya ade ye seme towē wūnya, epuli ele kodzela a.

XXXVI Yesu sua bati a kī bedzē ne awā osi kī betabi odima letsama ne letsa a kī bemó a akū.

Leme pupulidza esi be mbla, kitonekĩ be flee benaa benale letsa kĩ leya a.

XXXVII Bati a flee kĩ binu foletsa kĩ a, fokena be saa! Ade bibi akũ kĩ, “Yakena letsa nye letsa kakena wĩ. Efõ omumu ale kodzela, ade otosĩne leme anu foko a!”

## VIII

### *Yesu Kpa Bati Mpim Ena Funitsã.*

I Owi tábuna fomõ bati pii yatsena ne awã. Kĩ letsama lelãa kĩ baanya sũ ni, Yesu ve ye fotsa bakolene a efuãmo ye ade ebi be kĩ,

II “Bati kĩĩ foletsa ako yĩ konya kitonekĩ bena ne yĩ sekẽ fuwi elale flee. Ade finyaakĩĩ belã letsama kĩ baanya.

III Nte nfõne be awe mo bedzakũ mo kole ni, baanaa lokõa ane aasinya be ne osi, kitonekĩ badi to mo lugo.”

IV Ye fotsa bakolene a via ye kĩ, “Ne kosa kĩĩ kame, ndia oti odi aana funitsã ekpa bati kĩ benya biwĩ?”

V Awã na Yesu via be kĩ, “Abodoo eni minee?” Bibi ye kĩ, “Bõnee abodoo evũkõõ.”

VI Yesu bi bati a kĩ bekena akũ bidzi. Ade ebõe abodoo evũkõõ a. Enye Baguma kole ade eyele ye fokefoke a, ekõa ekpa ye fotsa bakolene a kĩ bekõa bekpa bati a flee. Be malo bete, ade besẽ bekpa be a.

VII Bõnee kofõabi kubii kudi leme ne awã, ade Yesu bõe koe leme enye kole a. Ekõa koe ekpa ye fotsa bakolene a kĩ besẽ koe leme bekpa be.

VIII-IX Bati a flee nya biwĩ. Bati a lidede aawo mpim ena. Kĩ benya biyua a, ye fotsa bakolene

a fila fuwuliwa a kī fute a bekpota ade fuyi koba tətsetse kpale kpale evũkɔnɔ a. Ke liti a, Yesu nyɛ bati a flee osi ade bɛdzakū a.

<sup>X</sup> Yesu mɔ ye fɔtsa bakɔlɛnɛ a wo nɛ ɔkɔlɔ kame binyina bɛnaa Dalmanuta tite akū.

*Farisifo Via Kī Yesu Ekɛna Awāwā Fɔtsa Etsa Be.*

<sup>XI</sup> Farisifo badi ya nɛ Yesu sɛkɛ ade bekavia ye fɔlɛtsa kī basɔ ye bɛdā. Foesū bibi ye kī ekɛna awāwā fɔtsa fudi lɔkɔa bɛmɔ kī eto Baguma sɛkɛ.

<sup>XII</sup> Lɛmɛ Yesu wɛya eke ade evia be kī, “Nde sū koū nviā babi awɛ kī bamɔ awāwā fɔtsa? Oowo, mabi mi kī nlāayakɛna awāwā fɔtsa a odu kī miawɛ nɛ awī!”

<sup>XIII</sup> Ɖdzakū nɛ be sɛkɛ ade ebuki ewo nɛ ɔkɔlɔ a kame enyina ɛnaa ɔwɔ lutubu baū a sɛkɛ sitide a.

*Yesu Tsa Kī Bati Támɔ Ye Biyi Ɔsū.*

<sup>XIV</sup> Kī banaa a, ye fɔtsa bakɔlɛnɛ a lɛla abodoo kabɔɛ kabu, foesū abodoo a amɔapɛ bɛna nɛ ɔkɔlɔ a kamɛ.

<sup>XV</sup> Yesu bi be kī, “Midā kadā wī nɛ Legā Herodes mɔ Farisifo oyila a akū.”

<sup>XVI</sup> Bekavia akū kī, “Ade ayekī bonɛɛ abodoo adima sū mɔ ɛlɛ fukī a.”

<sup>XVII</sup> Lɛmɛ Yesu nyi lɛtsa a kī bekale a, ade evia be kī, “Nde sū mialɛ abodoo katabɔɛ fɔlɛtsa? Foesū keyawo lɔkɔ kī a mitáyí ɔsū ñye mitánu foe kayɔ tɔ? Mi atɔ deĩ ɔsí paa! Miáte lɛtsama anɛ?”

<sup>XVIII</sup> Mideĩ anɛ lɛmɛ miámɔ! Mideĩ atɔ lɛmɛ miánu!

**XIX** Mitámò lókò a kǐ nsě abodoo elo nkpa bati mpim elo beba a? Tetssetse eni fòkefòke kubii a kǐ fute a yi?"

Bibi ye kǐ, "Kòba tetssetse ewua-nviã."

**XX** Yesu buki evia be kǐ, "Mò lókò a kǐ nsě abodoo evũkòno nkpa bati mpim ena a, awuliwa a kǐ ete a, tetssetse eni eyi?"

Bibi ye kǐ, "Te kpale kpale evũkòno."

**XXI** Ade evia be kǐ, "Keyawo nviã kǐ a, nde sũ mò miányi oti a odu kǐ ye manɛ?"

*Yesu Binya Ònekunɛ Anɛ.*

**XXII** Kǐ Yesu mò ye fòtsa bakolɛnɛ a wo Betsaida a, bati badi kpã ònekunɛ bema ye ade bike ye aduli kǐ ekòa awɛ ɛta ònekunɛ a.

**XXIII** Yesu pì oti a nɛ kòkpò ade ekpã ye enamena òmatò a òbaɛ a. Kǐ evũma tanɛ eko nɛ oti a anɛ kame a, ekòa awɛ ete nɛ ye akũ ade evia ye kǐ, "Amò litsedi?"

**XXIV** Ade oti a dzɛla anɛ ɛdã ode ɛlɛ kǐ, "Oo! Mamò bati, lemɛ badã ndɛ futse. Lemɛ betsɛ bamini."

**XXV** Ade Yesu buki ɛta ye anɛ a. Lɛyade kǐ kò oti a binya ye anɛ yededeede, ye anɛ kame kpale ade emò letsa nyɛ letsa kamò wĩ a.

**XXVI** Yesu nyɛ ye osi ebi ye kǐ ɛtabuki ɛtsã òmatò a kame enaa kòla.

*Petro Tsa Kǐ Yesu Nyɛ Oti a Kǐ Bɛbò Tòdò a.*

**XXVII** Ke liti a, Yesu mò ye fòtsa bakolɛnɛ a dzakũ nɛ awã benaa tukula kǐ tifuã Kaisarea nɛ Filipi kamekame a. Kǐ banaa nɛ osi a, Yesu via be kǐ, "Mibi yĩ oti a odu kǐ bati alɛ kǐ ye manɛ."

**XXVIII** Bibi ye kǐ, "Badi alɛ kǐ nò nyɛ Yohanes Mui Òwolɛnɛ a. Ade badi lemɛ alɛ kǐ nò nyɛ

Baguma Onukpě Ɔnyene Eliya. Badi bebã leme ale kĩ nɔ nye Baguma onukpě banyene kɔe a kame ɔmɔa.”

**XXXIX** Ade ke Yesu buki evia be kĩ, “Nde nye mi leme? Owei miale kĩ ye mane?”

Petro bi ye kĩ, “Nɔ nye Kristo a Kĩ Beboɔ Tɔdɔ a.”

**XXX** Yesu sua be osi kĩ betabi odima letsa a kĩ binyi ne ye akũ ne awĩ a.

*Yesu Le Kɔdzela Etomena Ye Wuda Mɔ Kayidza Akũ.*

**XXXI** Ade Yesu yi kayɔ mɔ ye fɔtsa bakolene a fɔtsa fudi katsa a. Ebi be kĩ, “Kene kĩ fɔya kĩ Otidziwa Obi a emɔ lubo etomena ɔmato banɔkɔẽ, Yudafɔ basɔfɔ banɔkɔẽ, mɔ Yudafɔ mbla batsane a awe kame. Ade baasĩ ye, beko ye, leme ne luwi lalalɛde akũ ni, yaayidza edzi nkpã.”

**XXXII** Ebi be fukĩ yededeede binu. Petro kpã ye enamena ɔwẽ, ade etsa kĩ bemɔ ye betákɛna ɔmɔa ne letsa a kĩ ele a akũ.

**XXXIII** Leme kĩ Yesu dani edã ye fɔtsa bakolene a, ekã Petro ane ele kĩ, “Dzakũ ne yĩ akũ Satana! Aáwe fɔtsa a kĩ Baguma awe a, mbom awe letsa a kĩ batidziwa awe a odi!”

**XXXIV** Foesũ Yesu ve bati kɔdabu a mɔ ye fɔtsa bakolene a beya ne ye sekẽ ade ebi be kĩ, “Nte odi awe kĩ yatomɔ yĩ ni, kene kĩ yafone ye apɛdie awe, ebɔe ye lubo kamɔ fɔlɔtsa luwi nye luwi lɔkɔa etomɔ yĩ ne liti.

**XXXV** Kitonekĩ oti kĩ ewe kĩ yapili ye nkpã ni, yaayɛla ye. Leme oti kĩ ekɔa ye akũ ekpa ne yĩ mɔ Kale Wĩ a sũ ni, yaana nkpã daa.



XXXVI Litsa nfaso oti aana nte ena katinya kame fotsa flee mo eyela ye nkpã moawe a?

XXXVII Ìye litsa oti aakoa evemena mo nkpã moawe a?

XXXVIII Foesũ nte yĩ mo yĩ fotsa katsa a flee nye fonyoãtsa fokpa odi ne ablo katinya kpa kĩĩ kame ni, ye malo yaanya fonyoãtsa ekpa Yĩ Otidziwa Obi, ne loko a kĩ bómó Baguma foto banyane kpalewa a bóaya ne Baguma kukũkpale a flee kame.”

## IX

I Yesu buki ebi be kĩ, “Mabi mi ne onokoali kame kĩ, badi deĩ ne mi kame ne awĩ kĩ beláaku kennaawo kĩ bémó Baguma legãkanya a ya mo kobẽ.”

### *Baguma Nye Yesu Kukũkpale Etsa.*

II Fuwi evũ liti a, Yesu kpã Petro, mo Yakobo, mo Yohanes benaa oto akũ, awã kĩ be bena. Kĩ fotsa bakolene a kadã a, Yesu akũ dani ne be ane kame,

III ade ye tetadie dani tivoe keba ayekĩ otidziwa aapuli evole te tené lomo.

IV Adeke fotsa bakolene elale a mó Baguma onukpẽ banyene Mose mo Eliya kĩ benye be akũ bekale kodzela mo Yesu a.

V Ade Petro bi Yesu kĩ, “Fotsa Otsane, fonene kĩ boya ne awĩ! Fõ bokena tepatampa elale, no ade amoa, Mose ade amoa, loko Eliya leme ade amoa.”

VI Leme enyina letsa a kĩ ekale a, kitonekĩ beténe kavila.

**VII** Lufulututu lidi ka leyasua be akū, ade odo né eto de kame kī, “Ade yī obi kī maátunɔ ye kale a, mitse ye kale!”

**VIII** Letaleta bedā foko bisinya leme betámɔ odima keba Yesu kī εdze ne be ɔwě.

**IX** Kī bito ɔto akū baka a, Yesu si be mbla kī, “Mitabi odima letsa a kī mimó a kennaawo loko kī Otidziwa Obi a yidza eto banokpa kame.”

**X** Befɔ kale kī kahɔ ne be lolɔ kame, leme nte be odi bidzi a bale kodzela ne foe akū kavia akū kī, “Kayidza kato kanokpa a kayo nye litsa?”

**XI** Adeke bivia Yesu kī, “Litsa sū Yudafɔ mbla batsane a ale kī, kene kī Baguma Onukpé Onyene Eliya enya loto eya?”

**XII** Yesu bi be kī, “Nuwī, kene kī Eliya enya loto eya ayekī yaamane letsa nye letsa eyi. Litsa sū betsele ne Katsela Kpalewa a kame kī Otidziwa Obi a aayamɔ lubo pii, bisupa ye leme a?”

**XIII** Mabi mi kī Eliya ya kokɔe ade bekena ye letsa a kī bewe a, nde ayekī betsele biyi ne ye akū a.”

*Yesu Tsa Kanyolebi Kadi Kī Hūhū Kpa Deī Ne Ke Kame.*

**XIV** Kī Yesu mɔ ye fɔtsa bakolene elale a muniki beya ne be nkae a sekě a, bemó bati kodabu baū kī bisinya be, ade mbla batsane a badi kavele folets a mɔ be a.

**XV** Kī bati a kodabu a mó Yesu a, akū dzuli be, ade biwula atse benawɔna ye a.

**XVI** Yesu via ye fɔtsa bakolene a kī, “Litsa folets a milamɔ kavele mɔ be?”

**XVII** Onyole odi ne bati kodabu a kame kpa mbuaye kī, “Fɔtsa ɔtsane, nkpā yī obi mma nɔ,

kitonekĩ hũhũ kpa deĩ ne ye kame ade yaapuli eĩe kodzela a.

**XVIII** Kako nye kako kĩ hũhũ a api ye ni, yaboe ye kamuni ne tite, ade kuvũ ane ne ye onukpẽ, yaba adõ lokoa ye akũ flee asinsĩ. Nkpã ye mma no fotsa bakolene a kĩ beblomena hũhũ a, leme betapuli.”

**XIX** Yesu bi be kĩ, “O! Nviã babi kĩ milá katekado! Maana ne mi sekẽ daa? Lokõ lodabe mado owole nvele mi nnaawo? Mikpã kanyolebi a mima yĩ!”

**XX** Bekpã ke bema Yesu. Kĩ hũhũ a sila emõ Yesu a, efufulinya kanyolebi a keka keto, kekamilinya ne tite kane kuvũ ne onukpẽ.

**XXI** Ade Yesu via olega kĩ, “Lokõ odabe fuyi ye kayo?”

Ekpa mbuaye kĩ, “Kito ane ye tibisẽ kame.

**XXII** Lokõ pii hũhũ kpa a awe kĩ yakõ ye, foesũ yaboe ye kamuni ne fi iye mui kame. Nte aapuli okena litsedi ni, mó boe konya lokoa kabumõ boe.”

**XXIII** Yesu bi ye kĩ, “Kale ole kĩ nte maapuli? Letsa nye letsa aapuli leya lekpa oti kĩ ete yĩ edo.”

**XXIV** Deedimõape kabisẽẽ a olega boa fowola kĩ, “Ndeĩ katekado, leme keronẽ, bumõ yĩ nna katekado mbu!”

**XXV** Kĩ Yesu mó kĩ bati kodabu a kadu kafuã be a, ewũni ne hũhũ kpa a akũ kĩ, “No hũhũ kpa otosĩne mõ omumu, mabi no kĩ ne ne kabisẽẽ a kame, tabuki oyaawo ne ke kame dadaada!”

**XXVI** Hũhũ kpa a boa fowola kooba, efufulinya kabisẽẽ a mõ osĩ, ebõ ke emuni ne tite, ade ené ne ke kame a. Kabisẽẽ a kena nde kaku kiku, foesũ bati a pii le kĩ, “Eku!”

XXVII Leme Yesu pi kabisëë a ne kòkpò ade kiyidza kedza a.

XXVIII Ke liti a, kī Yesu naa tòtò kame a, ye fòtsa bakolene a via ye petee kī, “Nde sū boe kō bótápuli bəblomēna hūhū kpa a ené ne ye kame?”

XXIX Ade Yesu bi be kī, “Béláapuli bəblomēna hūhū kīi odu, mbəente betsāmēna foe mpaəbò kame.”

*Yesu Buki Ele Kòdzela Ne Ye Wuda Akū.*

XXX Yesu mọ ye fòtsa bakolene a dzakū ne awā bənatsā Galilea. Yesu táwe kī odima anyi awā kī enaa,

XXXI kitonēkī ekatsa ye fòtsa bakolene a fòtsa. Ebi be kī, “Baakōa Otidziwa Obi a bido ne bati awe ade baakō ye a, leme ne luwi lələede liti a, yaayidza edzi nkpā.”

XXXII Leme betánu letsa kī ebi be a kayò, ade bivila kī bavia ye a.

*Owei Nye Oti a Kī Ebë Flee a?*

XXXIII Bəyawo Kapernaum omato a kame, ade kī biwo ne tòtò kame a, Yesu via ye fòtsa bakolene a kī, “Litsa kale mivēle ne osi a?”

XXXIV Leme betákpa ye mbuaye, kitonēkī ne osi akū a, bəkavēle fòlets a ne owula kī ebë flee ne be kame.

XXXV Yesu kena akū edzi eve fòtsa bakolene ewua-nviā a, ebi be kī, “Odi nye odi kī yawe lotò enya ni, kene kī enya bati a flee nkae mọ osumune.”

XXXVI Ke liti a, ekpā kabisëë kadi keyadza ne be ane kame, ade kī etu eboomu ke a, ebi be kī,

XXXVII “Odi nye odi kī yaate kabisēē kīī kame ɔmɔa ne yī dī akū ni, yī ete. Odi nye odi kī ete yī ni, nné yi odi ete, mbom ete oti a kī edo yī a leme.”

*Odi Nye Odi Kī Etáyidza Edza Ne Boe Akū Ni, Etomɔ Boe.*

XXXVIII Ade Yohanes bi Yesu kī, “Fɔtsa ɔtsane, bɔmó onyole odi kī ekablomena hūhū kpa ne nɔ dī akū, ade bubi ye kī efɔ, kitonekī eláa boe kame.”

XXXIX Yesu bi be kī, “Mitasua ye osi, kitonekī oti kī yakena awāwā fɔtsa ne yī dī akū ni, eláadani ele kale kpa ne yī akū.

XL Odi nye odi kī yaákena letsama katia boe ni, edzē ne boe liti.

XLI “Ɔnokɔali a mabi mi kī odi nye odi kī yaakpa mi mui mimɔa kī minye yī bade sū ni, yaana ye kɔtɔkase kokooko.”

*Bati Kakpā Kado Ne Tɔkpa Kame.*

XLII “Nte oti odi aafɔ kabisēē kīī kame ɔmɔa kī ete yī edo leyela ye katekado ni, fɔnene fɔbē fɔkpa oti a nte bekɔa kɔwɔle bevela ne ye somo, beta ye bido ne mpo kame.

XLIII-XLIV “Foesū nte nɔ awe afɔ akena tɔkpa ni, tsua ye kamuni. Fɔnene fɔbē fɔkpa nɔ kī aakɔa awe mɔa owo ne nkpā kī elá kawūna kame, keba kī odeī awe nviā lɔkɔa bekɔa nɔ bido ne fi luwotu kī laádī a kame.

XLV-XLVI Ade nte nɔ kɔbɔa akpā nɔ kado ne tɔkpa kame ni, tsua koe kamuni. Fɔnene fɔbē kī odeī kɔbɔa mɔa ɔna nkpā mɔawe a, keba kī odeī abɔa nviā ade baata nɔ bido ne fi kame a.

XLVII Nte no linebi akpã no kado ne tokpa kame ni, bole de kanye. Fɔnene fokpa no kɔ aakɔa linebi moa owo ne Baguma legãkanyakõ a, keba kɔ odei banebi nviã leme baata no bido ne fi luwotu kame.

XLVIII 'Awã kɔ batebi a kɔ bawo be a lãku dadaada, ade fi a kɔ fɔapila be a leme lãdɔ da a.'

XLIX Kitonekɔ baakɔa fi bekpale odi nye odi akũ nde ayekɔ bakɔa ledeme kakkale afolie akũ a.

L "Ledeme nene, leme nte de omene né ne de kame ni, nde aakena obuki okɔa omene odo ne de kame? Foesũ mina tokɔba kakena ledeme ne mi kame, lokɔa midzi ne lukudɔ kame mo akũ akũ."

## X

### *Yesu Tsa Fɔtsa Ne Kɔtsõ Mo Konyo Kasɔ Akũ.*

I Yesu dzakũ ne awã enaa Yudea amantam kame mo Yordan Owɔ liti. Bati kodabu buki beyatsena ne ye akũ ne awã, ade etsa be fɔtsa nde ayekɔ yawe kakena a.

II Farisifo badi ya ne ye sekẽ bewe kɔ baso ye bedã, foesũ bivia Yesu kɔ, "Boe mbla a kpa osi kɔ onyole esɔ otsõ?"

III Yesu kɔa kavia ekpa mbuaye kɔ, "Mbla adabe Mose kpa mi?"

IV Bekpa mbuaye kɔ, "Mose kpa osi kɔ onyole etsɛle kasɔ ovoli ekpa ye kanyi lokɔa esɔ ye."

V Yesu bi be kɔ, "Mose tsɛle mbla kɔ ne mi ato osɔ sũ."

VI Kito katinya kayokayi a, onyole mo otsole Baguma kena.

VII Ne fukɔ sũ onyole aafone olega mo oma awe ekena omɔa mo otsõ,

VIII Iokoa be nviã a baakena oti omoa. Foesũ bibuki benyé bati nviã, mbom bekena oti moa.

IX Foesũ letsa a kī Baguma boomu ni, otidziwa etasẽ foe kame!”

X Ke liti a, kī beya ne toto kame a, ye fotsa bakolene a via ye foletsa ne fukī ele a akū.

XI Yesu bi be kī, “Onyole kī esī otsõ mo ebuki ekõã obebã ni, ebõa adõpaa ne otsõ akū.

XII Ade ayea nte otsole fõne onyo awe mo enadzi mo onyole bebã ni, ye malo ebõa adõpaa.”

### *Yesu Hila Babisẽ Kubii.*

XIII Ne Iokõ a na kame a, bati badi kpã babisẽ bema Yesu kī ete awe ne be akū, lemẽ ye fotsa bakolene a kã be ane.

XIV Kī Yesu mo fukī a ni, ena kalokpa ade ebi ye fotsa bakolene a kī, “Mifõ babisẽ beya ne yī sekẽ, mitasua be osi, kitonekī ade bati kī odu lá Baguma legãkanyakõ a.

XV Onokõali a mabi mi kī odi nye odi kī etate Baguma legãkanyakõ a nde obisẽ aye ni, eláawo ne Baguma legãkanyakõ a kame da.”

XVI Ke liti a, etu eboomu babisẽ a, ade ete awe ne be akū ehila be a.

### *Osikani Odi Via Yesu Osi a Kī Ye Akū Yaatsã Ena Nkpã Wī a.*

XVII Kī Yesu yidza epi osi a, onyole odi wula atse eyake aduli ne ye ane kame evia ye kī, “Fotsa Otsane Wī, litsa kene kī nkena fomõ maana nkpã kī elá kawūna a?”

XVIII Yesu via ye kī, “Nde sũ ave yī oti wī? Odima lenyé oti wī mboente Baguma odi.

**XIX** Onyina Baguma mbla a. Tako oti, tane konyo ñye kotsõ liti, taye, tama fovã ote ne oti akũ, tasisi oti, mo bu aga mo ama.”

**XX** Onyole a bi ye kĩ, “Fotsa Otsane, kito ne yĩ tibisẽ kame kĩ makena ne tebla a flee akũ.”

**XXI** Yesu dã ye kenaana ne odo kame, ade ebi ye kĩ, “Kite no letsa moa. Naa kanaafila fotsa a kĩ odeĩ a flee kanõ, kakõa sika a kakpa ahiãfo, lokõa aadani okena osikani ne ode. Ke liti a, ya kayaatomõ yĩ!”

**XXII** Kĩ onyole a nu foletsã kĩ a, emuna ane ade edzakũ mo ayolohõ a, kitonekĩ ena akũ.

**XXIII** Yesu dã ye fotsã bakolene a etsena ade ebi be kĩ, “Fõana osĩ paa fokpa osikafõ kĩ baawo ne Baguma legãkanyakõ a.”

**XXIV** Foletsã kĩ dzuli ye fotsã bakolene a akũ. Lemẽ Yesu buki ebi be kĩ, “Yĩ babi, Baguma legãkanyakõ a kame kawo deĩ osĩ paa fokpa asikafõ.

**XXV** Fõadã boẽẽ fokpa opõnko mo kapu kĩ yaatsã onobõ oke kame ene keba kĩ osikani aawo ne Baguma legãkanyakõ a.”

**XXVI** Foletsã kĩ a kena fotsã bakolene a wãwã paa. Ade bekavia akũ kĩ, “Lokõa oweĩ kou aapuli ena nkpã kate?”

**XXVII** Yesu dã be kenanaana ade ele kĩ, “Batidziwa sekẽ mo folãapuli fõya, lemẽ nnẽ mo Baguma, kitonekĩ letsã nye letsã adã boẽẽ lekpa Baguma.”

**XXVIII** Ade Petro le kĩ, “Dã, bofõne letsã nye letsã awe buyi boya butomena no.”

**XXIX** Yesu le kĩ, “Mabi mi ne onokõali kame kĩ odi nye odi efõne ye toto eyi, ñye bawãnyole mo



bawaētsole, ãye oma, ãye olega, ãye ye babi, ãye foba eyi ne yĩ mo Kale Wĩ a sũ ni,

XXX yaana fotsa pii eba ne loko kĩĩ kame. Yaana fola titi oha, bawaēnyole mo bawaētsole, bama mo babi, mo foba, mo bati liti katomena. Ade ne loko kĩ laya kame a, yaana nkpã kĩ elá kawũna da a.

XXXI Leme bati pii kĩ benye batonyade a finyaa aakpa liti, ade bati batide finyaa aakena loto banyane.”

*Yesu Le Kale Lelaledede Ne Ye Wuda Akũ.*

XXXII Finyaa Yesu mo ye fotsa bakolene a yele banaa Yerusalem. Yesu nyaa be loto ade fokena ye fotsa bakolene a saa a, bati a kĩ bitomo be ne liti a kavila. Yesu buki eve ye fotsa bakolene ewua-nviã a enamena owẽ ade ekabi be letsa a kĩ laaya ne ye akũ a.

XXXIII Ebi be kĩ, “Mitse! Boanaa Yerusalem awã kĩ baakoa Otidziwa Obi a bido ne basofonokõẽ mo mbla batsane a awe. Baako ye koto bekpa wuda lokoa bekoa ye bido ne bikĩ benyé Yudafõ awe.

XXXIV Baadi ye nsekua, bitua tane biko ne ye akũ, baabo ye mo mple ade baako ye a, leme ne luwi lelaledede akũ a, yaayidza edzi nkpã.”

*Yakobo Mo Yohanes Wã Yesu Banokõẽ Fudzikõ.*

XXXV Ke liti a, Zebedeo babi kĩ benye Yakobo mo Yohanes ya ne Yesu sekẽ ade bibi ye kĩ, “Fotsa Otsane, boawe kĩ kena letsa a kĩ boavia no a kakpa boe.”

XXXVI Yesu via be kĩ, “Litsa foane?”

XXXVII Bibi ye kī, “Nte ɔne odzi ne nɔ legãkpo akū ne nɔ kukūkpale kame ni, boawe kī budzi ne nɔ ɔwẽ, boe kame ɔmɔa ne nɔ sɔmɔna, ɔmɔa leme ne nɔ sebã.”

XXXVIII Yesu bi be kī, “Minyina letsa kī de milamena kavia a! Mite mido kī míapuli mimɔa lubo kamɔ kɔɔpu a kī kene kī mmɔa? Īye míapuli mite mui kawɔla a kī maate a?”

XXXIX Bekpa mbuaye kī, “Bɔapuli.”

Yesu bi be kī, “Oo, míapuli mimɔa kɔɔpu a kī maamɔa a, mɔ mui kawɔla amanie a kī maate a.

XL Leme nlá osi kī mapau oti a kī ye aadzi ne yī sɔmɔna ĩye sebã. Baguma nye oti a kī yaakɔa foe ekpa bati a kī emanɛ foe eyi a.”

XLI Kī fɔtsa bakɔlene ewua nkaɛ nu fɔletsã kī a, bena kalɔkpa ne Yakobo mɔ Yohanes akū.

XLII Foesū Yesu ve be ekpɔta ebi be kī, “Minyina kī bati a kī babu kī benya tɔnɔkɔẽ ne amamufɔ akū a, deĩ kobẽ ne be akū, ade banɔkɔẽ kī deĩ otumí ne be akū a.

XLIII Leme ketáne kī foana lomɔ ne mi kame. Nte mi kame odi awe kī yanya ɔnɔkɔẽ ni, kene kī enya mi ɔsumune.

XLIV Nte mi kame odi we kī yanya ɔnɔkɔẽ ni, kene kī enya be nkaɛ a ɔsumune.

XLV Kitonekī Otidziwa Obi a malo táya kī bisum ye, mbom eya kī yasum bati ekɔa ye nkpã ekpa lokɔa ete bati pii nkpã.”

### *Yesu Tsa Bartimeo ɔnekune a.*

XLVI Ke liti a, Yesu mɔ ye fɔtsa bakɔlene a yawo Yeriko. Kī bane ne ɔmato a kame a, bati kodabu baũ tomɔ be. Kī banaa ne osi a, bemó ɔnekune

odi kī bave Bartimeo, Timeo obi kī edzi ne osi ɔwẽ yawã fɔtsa.

**XLVII** Kī enu kī Yesu Nazaretni a lɛyaatẽ a, edo fɔwɔla kabɔa awɛ kī, “Yesu! Dawid obi! Mɔ yī kɔnya!”

**XLVIII** Bati pii wūni ne ye akū kī esua onukpẽ. Lɛmɛ ebɔa fɔwɔla kɔɔba eba kī, “Dawid obi! Mɔ yī kɔnya!”

**XLIX** Yesu fɔ edza ade ɛɛ kī, “Mivɛ ye mikpa yī.”

Foesū beve ɔnekunɛ kī bibi ye kī, “Fɔ ɔwɔɛ ɛka edzi nɔ! Yidza mɔ atɛ, yave nɔ.”

**L** Awã naa ɛta ye atadiɛ wulaa eyi ne ɔwẽ eyidza edza, enaa Yesu sɛkẽ.

**LI** Yesu via ye kī, “Litsa awɛ kī nkɛna nkpa nɔ?”

ɔnekunɛ a bi ye kī, “Fɔtsa ɔtsanɛ, fɔ mbuki mmó fɔkɔ!”

**LII** Ade Yesu bi ye kī, “Naa. Nɔ katekado tsa nɔ.” Deedimɔape ye anɛ binya ɛmó fɔkɔ, ade etomɔ Yesu ne osi a akū a.

## XI

*Yesu Wo Ne Yerusalem ɔmato Kame Nde Legã Aye.*

**I** Kī bifuã Yerusalem a, bekɔa bawo Betfage mɔ Betania temato a, beyawo Kugua Futse ɔto akū. Ne awã Yesu do ye fɔtsa bakɔɛnɛ nviã kī benya lotɔ,

**II** mɔ ɔɛdo kī, “Minaa akula a kī ɛwaa ne lotɔ a kame. Ntɛ miwo ye kame pɛ, míamɔ aflim obi kī bido ɔwẽ bedzɛla kī odima tádzi tɔ ne ye akū. Miwūnya ye ne ɔwẽ kame mikɔa miyamɛna.

III Nte odi via mi kī, ‘Nde sū miawũnya ye’ ni, mibi ye kī mi ɔlate sī ye, ade yaakɔa ye emena moatse a.”

IV Foesũ bati a naa, ade benamo kī bido aflim obi ɔwẽ edzẽ ne ɔblonu akũ ne kola onyukpẽ. Ade kī bekawũnya ye ne ɔwẽ kame a,

V bati badi kī bedza ne awā a via be kī, “Litsa miakena ne awā? Litsa sū miawũnya aflim obi a?” VI Bekpa mbuaye nde ayekī Yesu bi be a, ade bati a kpa be osi benye ye a.

VII Kī bekɔa ɔyae a bema Yesu a, bedzele be tilima biko ne ye akũ, ade Yesu de edzi ne ye akũ a.

VIII Bati pii dzele be tilima biko ne osi akũ, ade badi leme veli tenane mo toota biko ne osi akũ a.

IX Bati a kī benyaa loto mo bikī bitomena ye a do fowola kabɔa kale kī, “Hosiana! Mimu Baguma!

Baguma hila oti a kī yaya ne ɔlate a dī akũ!

X Baguma hila Boe ɔlega Dawid legākanyakõ a kī kaya a!

Hosiana deĩ ne ode flee flee!”

XI Kī Yesu wo Yerusalem a, enaa Yudafɔ Asoli Kɔla a kame, ade eko ane edā letsa nye letsa etemena a. Leme kī kade lamena kado sū ni, bemɔ ye fotsa bakolene a ewua-nviã dzakũ benaa Betania.

### *Yesu Dumu Kutse Kudi Kī Kotawũ Babi.*

XII Kī kade nyina bimuniki bito Betania baya a, kole ko Yesu.

XIII Emó kutse kudi kī kɔawũ babi kī bave figi mo lugo, kotale mo toota beblebee ne koe akũ. Foesũ enadã nte yaana babi badi ne koe akũ. Leme kī ewo kutse a kayɔ a, etámo

babi badimano, mboente toota nene teĩ, kitonekĩ kutse a kawũ loko táwo tã oto.

<sup>XIV</sup> Ade Yesu bi kutse a kĩ, “Odimano leláabuki enya no babi dadaada!” Ye fotsa bakolene a nu foe.

*Yesu Blomena Koyaato Banyane Ne Baguma Asoli Kola a Kame.*

<sup>XV</sup> Kĩ biwo Yerusalem a, Yesu naa Asoli Kola a kame ade edo bati a kĩ bekano fotsa, mo bikĩ bekaya fotsa a kablomena kanemena awe a. Edu sika babene a tupunu ewula, ade edu bikĩ bidzi bano mbloduma a leme fukpo ewula a.

<sup>XVI</sup> Ade etákpa osi malo kĩ odima aboe letsama etsã kola kame etemena a.

<sup>XVII</sup> Ke liti a, etsa bati a fotsa ele kĩ, “Betsela ne Katsela Kpalewa a kame kĩ Baguma le kĩ, ‘Baave yĩ Asoli Kola kĩ

kame katinya kame bati flee mpaε kabokõ.’ Leme midani koe mikena bayekpane kabelakõ!”

<sup>XVIII</sup> Basofonokõ mo mbla batsane a nu foletsa a kĩ Yesu le a, foesũ bewe osi a kĩ baatsã beko ye. Leme bivila ye kitonekĩ ye fotsa katsa a nyene bati kodabu a flee akũ.

<sup>XIX</sup> Kĩ kiwo olobe loko a, Yesu mo ye fotsa bakolene a ne ne omato a kame.

*Yesu Tsa Fotsa Ne Mpaεbo Mo Katekado Akũ.*

<sup>XX</sup> Luwi leyade onone tutuutu kĩ betse ne osi banaa a, bemó kĩ kutse a kĩ kawũ babi a ku kito loló kenawo tunu akũ.

<sup>XXI</sup> Petro te ane ne letsa kĩ leya a akũ, ade ebi Yesu kĩ, “Fotsa Otsane, dã! Kutse a kĩ odumu a ku!”

<sup>XXII</sup> Yesu bi be kĩ, “Mite Baguma mido.

XXIII Mabi mi ne ɔnɔkɔali kame kī odi nye odi kī yaabi ɔto kī kī ebɔle enaato ne mpo kame, mo etate atsindze ne ɔwɔle kame mbom ete edo kī letsa a kī ele a aaya ne foe kame ni, fɔaya lomɔ.

XXIV Foesū mabi mi kī letsa nye letsa kī míavia Baguma ne mpaɛbo kame ni, mite mido kī mina foe, ade Baguma aakpa mi foe a.

XXV Ade nte midzē miabɔa mpaɛ mo mimó kī oti odi fum mi ni, mikɔa mite ye ayekī mi ɔlega ne ode a leme aakɔa mi tɔkpa ete mi.

XXVI Leme nte mitákɔa bati tɔkpa mite be, mi ɔlega ne ode a leme lelákɔa mi tɔkpa a ete mi!"

*Bati Via Yesu Ye Kɔbē Katokɔ.*

XXVII Ade Yesu mo ye fɔtsa bakolene a buki benaa Yerusalem a. Kī Yesu ne etsē yamini ne Asɔli Kɔla kame a, basɔfɔnɔkɔē, mbla batsane a mo ɔmato banɔkɔē badi ya ne Yesu sekē,

XXVIII ade bivia ye kī, "Kɔbē ɔdabe ɔne akena fɔtsa kī? Owei lekpa no osi kī kena fɔtsa kī?"

XXIX Yesu kpa be mbuaye kī, "Maanya lotɔ nvia mi kale mɔape. Nte mikpa ke mbuaye ni, maabi mi kɔbē a odu kī nne makena fɔtsa kī.

XXX Mibi yī Yohanes bati mui kawɔla a ni, Baguma sekē futo mbɔɛ kī batidziwa sekē futo? Mikpa yī mbuaye."

XXXI Biyi fukī kavele ne be kame awe ade bele kī, "Litsa bóale? Nte bóle kī kɔbē a to Baguma sekē ni, yaavia boe kī, 'Kekɔ litsa sū mitate Yohanes mido?'

XXXII Mbɔɛ bóale kī futo batidziwa sekē?" Leme bavila bati kɔdabu a, kitonekī odi nye odi abu Yohanes kī enye Baguma onukpē ɔnyene.

XXXIII Foesū bekpa Yesu mbuaye kī, "Bunyína."

Ade Yesu bi be kī, “Yī malo nláabi mi awā kī kóbē a to nneε makena fotsa kīi!”

## XII

*Yesu Bɔa Legbã Ne Waĩ Kɔba Akũ  
Badāmenane Akũ.*

<sup>I</sup> Ke liti a, Yesu tsa be fotsa ne fɔgbã kame εε kī, “Onyole odi ne waĩ futse kɔba, edzi kɔbã esinya koe. Enye lεke ne kɔba a kayite, awā kī yaana kutse babi a εkpɔta, εkakã mui a kako. Ade eke kɔla geĩ kudi, ayekĩ koe akũ ɔdāmenane a aadzi εkadā kɔba a akũ. Ekɔa kɔba a edo ne apaafɔ awe kī bekaadā koe akũ, ade εdzakũ enaa osi akũ a.

<sup>II</sup> Kī lɔkɔ wo ɔto kī baana babi a, onyole a do ye ɔsumune ne be sekē kī enaatε ye kanyakɔ̃ ema ye.

<sup>III</sup> Lemε ye apaafɔ a pi fɔto ɔnyane a bibo ye ade beblɔmɔ ye mɔ awe pupulidza a.

<sup>IV</sup> Onyole kīi buki edo fɔto ɔnyane bebã. Kī enaa a, apaafɔ a bo ye, bipila ye ne lolɔ, bido ye kɔnyɔã lemε.

<sup>V</sup> Kɔba ɔlate a buki edo fɔto ɔnyane bebã, adeke beko ye a. Ade aye bekena babebã pii a. Bibo badi, beko babebã lemε.

<sup>VI</sup> “Oti kī ete kī yaado nye ye mɔawe obi kī yaátunɔ kale. Ne kawūna kame a, edo ye obi a kī yawε kale paa a, εε kī, ‘Mate kado kī baakpa yī obi kīi kɔ̃ obu.’

<sup>VII</sup> “Lemε kɔba akũ badāmenane kīi bi be akũ kī, ‘Ade adzapadiε ɔnyane a ne awī a. Miya bokɔ ye ayekĩ ye adzapadiε a aakena boe ade!’

VIII Foesũ, bipi obi a beko ye, beta bimuni ne waĩ koba a liti.”

IX Ne awã a, Yesu via bati a kĩ, “Litsa waĩ koba olate a aakena? Yaaya eyaako apaafõ a ekõa waĩ koba a edo ne bati bebã awe.

X Mbõee mitákã ne Katselẽ Kpalẽwa a kame kĩ, ‘De a kĩ fõla bakene sĩ a, ade de leyadani kola okonto akũ de a.

XI Baguma lekẽna fõtsa kĩ, ade fonye awãwã fõtsa ne boe ane a!’ ”

XII Yudafõ banõkõẽ a we kĩ bapi Yesu, kitonekĩ bemó kĩ ebõa legbã a etia be, leme bivila bati kodabu a, foesũ befõne ye ade bedzakũ a.

*Bivia Yesu Ogõle Kate Akũ Fõletsã.*

XIII Ke liti a, bido Farisifõ badi mo bikĩ bitomena Herodes a kĩ benaa Yesu sekẽ, benaanaĩ ye ne tedake kame mo fõletsã kavia bekõa bipi ye.

XIV Kĩ beya ne ye sekẽ a, bibi ye kĩ, “Fõtsã Otsane, bunyina kĩ ale onõkõali daa, ade otsãla letsã a kĩ bati akõna ne nõ akũ a. Aãdã oti ane, mbom atsa Baguma akũ onõkõali osi a. Bi boe nte boe Mbla kpa osi kĩ bute ogõle bokpa Roma Legãnokõẽ. Bute mbõee kĩ botate?”

XV Leme Yesu mó be tedake a, foesũ evia be kĩ, “Nde sũ miawe kĩ miasõ yĩ midã? Mikõa sika a miyamena ndã!”

XVI Bekõa somõa bema ye, ade evia be kĩ, “Owei lolõ mo dĩ teĩ ne se akũ?”

Awã naa bekpa mbuaye kĩ, “Roma Legãnokõẽ Kaisare.”

XVII Ade Yesu bi be kĩ, “Kekõ mikõa letsã kĩ lenye Kaisare lide a mikpa ye, ade letsã kĩ lenye Baguma lide a leme ni, mikõa mikpa Baguma.”



Fukĩ fõ akũ nyene be ne Yesu akũ.

*Fõletsa Kavia Ne Kayidza Kato Kanokpa Akũ.*

**XVIII** Ade Zadukifõ kĩ bale kĩ bati kayidza kato kanokpa leláa a kame badi ya ne Yesu sekẽ, beyavia ye kĩ,

**XIX** “Fõtsa Ɔtsane, Mose tsele mbla kĩ eyi ekpa boe kĩ nte onyole odi ku efone ɔtsõ kĩ bemɔ ye betáma ni, ɔwaẽnyole ekõã okunawa a, lokoa bema babi bekpa ɔtonyade a.

**XX** Fõya kĩ bawaẽ evũkõno badi dzi nkpã. Ɔnokõẽde a kõã ɔtsõ ade eku a, kĩ betáma obi odima.

**XXI** Ade ɔyade a kõã ɔsole a, ade ye malo eku, kĩ betáma obi odima. Ɔwaẽ ɔlalẽde a lemẽ kõã ɔsole a, ade ye malo eyaku kĩ betáma obi odima.

**XXII** Ade aye a be evũkõno a kõã ɔsole a, lemẽ be flee a biku kĩ bemɔ ɔsole a betáma babi. Ne foe kawũna a ɔsole a lemẽ yaku.

**XXIII** Ne kayidza kadzi nkpã kame mɔ nte biyidza a ni, be kame ɔwɔdabe ɔtsõ ɔsole a aanya? Be evũkõno a flee bekõã ye tõ?”

**XXIV** Yesu kpa be mbuaye kĩ, “Mikena mfumsu, kitonekĩ minyina Katselẽ Kpalewa a fõletsa ñye Baguma kóbẽ a.

**XXV** Nte banokpa yidza bidzi nkpã ni, baana nde ode fõto banyane ade beláakõã batsõ a ñye bidzi fõnyo a.

**XXVI** Lemẽ ne banokpa kayidza akũ ni, mitákã ne Mose ovoli a kame fõletsa a kĩ Baguma le ne kutse a kĩ kɔkatẽ a akũ? Baguma bi Mose kĩ, ‘Yĩ nye Abraham Baguma, Isak Baguma mɔ Yakob Baguma.’

XXVII Fukĩ atsa kĩ enye bati kĩ bidzi nkpa Baguma, nné banokpa Baguma yane. Mikena mfumsu paa!”

*Mbla Wodabe Nye Atonyade Flefle?*

XXVIII Ade Yudani mbla otsane odi kĩ ena ne awã a, nu foletsa kame kasa a. Emó kĩ Yesu kpa Zadukifo a mbuaye wĩ, foesũ efuã Yesu evia ye kĩ, “Mbla wodabe nyaa Baguma tebala a flee loto?”

XXIX Yesu kpa ye mbuaye kĩ, “Betselē mbla a kĩ ebẽ a betsa kĩ, ‘Israelfo, mitse! Olate a nye boe Baguma, ade ye odi lemē deĩ a.

XXX Foesũ awe Olate, no Baguma a, mo no owole flee, mo no okla flee, mo no adzuni flee mo no kobẽ flee.’

XXXI Ade mbla siwa ayade nye kĩ, ‘We no okoba kale nde ayekĩ awe no akũ a.’ Mbla adima buki ebé tebala kĩ.”

XXXII Adeke mbla otsane a kpa mbuaye kĩ, “Fotsa Otsane, ole foe kale wĩ. Onokwali fone nde ayekĩ ole kĩ Olate a odi nye Baguma, ade Baguma adima buki eláa keba ye odi a.

XXXIII Foesũ kene kĩ oti ewe Baguma kale mo ye owole flee, ye adzuni flee mo ye kobẽ flee. Ade kene kĩ ewe ye okoba kale nde ayekĩ yawe ye akũ kale a. Fone ne kĩ oti ekena ne tebala nviã kĩ akũ keba kĩ yaaboa bayae mo afolie bebã ekpa Baguma.”

XXXIV Kĩ Yesu mo kĩ onyole a kpa ye mbuaye ne nyansã kame a ni, ebi ye kĩ, “Mimo Baguma legākanyakõ a kayite lelá lugo.” Ne fukĩ liti a, odimano tápuli edo owole evia Yesu kale kadima.

*Foletsa Kavia Ne Oti a Kĩ Enye Kristo a Akũ.*

XXXV Kĩ Yesu katsa fotsa ne Asoli Kola a kame a, evia be kale kī, “Nde fola sū mbla batsane a aapuli bele kī Kristo a aanya Legã Dawid kasinu obi?”

XXXVI Hūhū Kpalewa a lefõ Dawid le eyi kī,  
 ‘Baguma bi yī Ìlate kī,  
 “Kena akū kadzi ne yī somona ne awī,  
 kenawo kī maakoa  
 no bakesine ndo ne no aboa kayo.” ’

XXXVII Kĩ Legã Dawid moawe ve ye kī Ìlate a ni, nde fõapuli fõya kī Kristo a aanya Dawid kasinu obi?”

Bati kodabu baū dza ne awã bekatse Yesu folets a mo kawole.

### *Yesu De Bati Ne Mbla Batsane a Akū.*

XXXVIII Kĩ Yesu katsa bati a fotsa a ebi be kī, “Midã kadã wī ne Yudafo mbla batsane a akū. Bado tetadie wulaa katsã kawe kī bati bewõna be ne obu kame ne koyaatõ.

XXXIX Bawe banokõẽ fudzikõ kadzi ne be fotsenakõ mo obu fudzikõ kadzi ne kanyakõ.

XL Basi bakunawa kate be toto ne be awe. Baboa mpae gelele kakoa kapia be akū. Be soto kavele aana osi seba bati bebã fude.”

### *Okunawa Ohiãni Odi Te Ogole.*

XLI Ade Yesu nadzi ne Asoli Kola a kame efuã ogole kate adakã a, ekadã ayekī bati lamo sika kata kado a. Asikafõ pii ta sika baū baū bido ne ye kame.

XLII Adeke okunawa ohiãni odi leme ya ade ekoa kaple nviã edo ne adakã a kame a.

XLIII Ne awã a Yesu ve ye fotsa bakolene a ekpota ebi be kī, “Onokõali mabi mi kī okunawa

ohiāni kīi letsa a kī edo ne ɔgɔle adakā kame a pɔne fɔbē bati a flee fude.

<sup>XLIV</sup> Kitonekī bati bebā a kɔa akū kana fɔtsa a kī fute a fudi beyate ɔgɔle, leme otsole ohiāni kosokoso kīi kō, letsa kī edeī a flee ekɔa ete. Ekɔa letsa a kī de akū yaadzi nkpā a eyate ɔgɔle.”

## XIII

*Yesu Le Yerusalem Asoli Kɔla a Kabubuli Akū Fɔletsa.*

<sup>I</sup> Kī Yesu ne eto Asoli Kɔla kame yanaa a, ye fɔtsa bakɔlene a kame ɔmɔa bi ye kī, “Fɔtsa ɔtsane, dā fɔla mɔ kale mɔ boe kpale kīi!”

<sup>II</sup> Yesu bi ye kī, “Amɔ fɔla kpale kpale kīi. Belátina de a kame lidima ne lokɔba akū kī beláadu biwula! Baatinya de lidi nye lidi biwula.”

*Lubokamɔ Mɔ Bati Liti Katomena.*

<sup>III</sup> Kī Yesu ne edzi ne Kugua Futse ɔto a akū, etselamɔ Asoli Kɔla a, Petro, mɔ Yakobo, mɔ Yohanes mɔ Andrea ya ne ye sekē beyavia ye petee kī,

<sup>IV</sup> “Boe ɔlate, loko wɔdabe fukīi aaya ne foe kame? Bi boe fɔtsa a kī fɔaya fɔkɔa fɔtsa kī loko a wo ɔto kī fɔtsa kīi flee fɔya ne foe kame.”

<sup>V</sup> Ade Yesu bi be kī, “Midā kadā wī, ade mitafō odima leke mi a.

<sup>VI</sup> Bati pii aaya ne yī dī akū bibi mi kī, ‘Yī nye Kristo a!’ ade baake bati pii a.

<sup>VII</sup> ɔwɔle etabole mi nte minu kawūkanɔ nkā ne mi ɔwē iye kawūkanɔ akū fɔletsa mɔ lugo. Kene kī fɔtsa kīi bame odu fɔya ne foe kame, leme fɔátsa kī katinya kame kawūna a wo ɔto.

VIII Ɔmaĩ mɔ ɔmaĩ aano akũ. Legãkanyakõ aayidza ne legãkanyakõ akũ. Tite aakuna ne foko kumekume, ade kole aaya a. Leme fukĩ flee la nde seme kapi kayokayi lubo kamɔ a aye.

IX “Kene kĩ mi moawe a miana ne konete kame. Baapili mi lokoa bekoa mi benamena foletsa kadzekõ. Baabo mi ne fotsenakõ. Baafõ midza ne fogã mɔ ɔmaĩ banokõ ane ne yĩ sũ, lokoa mibi be Kale Wĩ a.

X Leme fomɔ katinya kawũna a aaya ni, kene kĩ benya lotɔ bide letsã ne Kale wĩ a akũ beka fude fude a flee.

XI Nte bipi mi bekoa mi benamena foletsa kadzekõ ni, mitanya lotɔ mibo akũ ne letsa a kĩ miale a akũ. Nte loko a wo ɔto ni, mile letsa nye letsa kĩ baakpa mi kĩ mile a. Kitonekĩ foletsa a kĩ miale a lelanya mi fude, mbom fɔato Hũhũ Kpalewa a sekẽ.

XII “Bati aakoa be moawe bawaẽ beka kĩ beko, ade balega leme aakena foe moape a ne babi akũ. Babi aayidza bedza ne be bamane akũ, befõ beko be.

XIII Odi nye odi aakesĩ mi ne yĩ sũ. Leme odi nye odi kĩ yaadza pintii kenaawo ye nkpã kawũna ni, Baguma aakpa ye nkpã.”

*Yesu Tsa Ayekĩ Bikĩ Bitomɔ Ye a Aamɔ Lubo Mɔ Liti Katomena.*

XIV Yesu buki ele kĩ, “Nte mimó fukesĩtsa mɔ libe kĩ fokɔ ɔmaĩ kĩ fodzẽ ne awã kĩ ketane kĩ fona a ni, ovoli okãne a enu foe kayo kanu wĩ, lokoa bati a kĩ bideĩ ne Yudea a bilo benaa tɔto akũ.

XV Oti kī edzi ne ye kola letsā a, etaduma eya ne tite kī yaaboe litsedi etomena ye kola kame ekpa ye akū.

XVI Oti kī edeī ne ye koba kame etamuniki enaa kola kī yanaaboe ye lima.

XVII Boboe makpa batsole a kī betsemo foma mo bikī benee babi kī bameme ne loko a na kame.

XVIII Miboa mpaē mikpa Baguma kī fotsa kī fotaya ne osili loko!

XIX Kitonekī lubo kamō a kī laaya ne loko a na kame aana osī leba lidi nye lidi kī leya to ne katinya kame, kito ne kayokayi kī Baguma boā katinya a keyawo finyaa. Adeke lubo kamō kī odu lelāabuki leya dadaada a.

XX Lemē Olate a tinya lubo kamō fuwi a akū. Nte ne aye ni, kufe odima lelāana nkpā. Lemē ne ye bati a kī epau a sū ni, etinya fuwi a akū.

XXI “Foesū nte odi bi mi kī, ‘Dā! Kristo a deī ne awī,’ iye ‘Edeī ne akū,’ mitate ye mido!

XXII Kitonekī fovā Kristo ame, mo fovā Baguma onukpē banyene aane. Baakena awāwā fotsa mo nsentseleni pii kī nte baapuli ni, baakoa beke bati a kī Baguma pau a malo.

XXIII Mi kō midā kadā wī! Mbi mi letsa nye letsa ñnyamena loto fomō loko a aawo oto.”

### *Otidziwa Obi a Kaya.*

XXIV Yesu le enamena loto kī, “Ne fuwi a kī fōaya ne lubo kamō fuwi liti a,

‘suwa aadī sekēna tūū,  
odeto lemē lelāabuki evole.

XXV Fusibii aato ode foto,  
ade odetó kame kobē a kī kupini ode a  
aakuna akū.’

XXVI “Ke liti a, baamɔ Otidziwa Obi a, kī enɛ yaya nɛ liflututu kame mɔ kɔbɛ mɔ kukūkpale baũ.

XXVII Adeke yaado ode foto banyane a kī benaakpɔta bati a kī epau eyi a, bitomɛna katinya kame tukonto ena a kame kito tite kakpulakɔ kɛnaawo ode kakpulakɔ.

*Fɔtsa Kakɔle Nɛ Kutse Kī Kɔawũ Babi a Akũ.*

XXVIII “Mikɔle fɔtsa nɛ kutse kī kɔawũ babi a akũ. Nte fɔya kī mimó kī kutse a na né tenane kɔnye tɔɔta vɔɛ ni, minyi kī ovio lokɔ fuã.

XXIX Ade aye nte mimó kī fɔtsa a kī do kaya awe pɛ, minyi kī lokɔ a fuã, ade liti liwo onyukpɛ malo a.

XXX Ɔnɔkɔali a mabi mi kī mi letsã babi a flee leláaku fɔmɔ fɔtsa kī flee aaya nɛ foe kame.

XXXI Tite mɔ ode flee aayatɛ, lemɛ yĩ kalɛ a kɔ leláatɛ da.

XXXII “Lemɛ luwi a ãye ɔɔɔũ a, odima linyína de. Ode foto banyane a mɔ Baguma Obi mɔawe a malo linyína, mbɔente Ɔlega a odi keĩ nyina.

XXXIII Midã kadã wĩ mina nɛ kukūmanɛ kame, kitonkī minyína luwi a kī de akũ lokɔ a aawo ɔɔ.

XXXIV Fɔana ndɛ ayekī onyole odi naa osi akũ, ade efɔnɛ ye tɔɔ eyi ye basumunɛ a. Ekpa odi nyɛ odi ye kɔbɛ mɔ adzuma kī ekɛna. Ke liti a, esi onyukpɛ ɔɔãmenanɛ a mbla kī ena nɛ kukūmanɛ kame.

XXXV “Nɛ foesũ mina nɛ kukūmanɛ kame, kitonkī minyína lokɔ a kī tɔɔ ɔlate a aaya. Fɔapuli fɔnya olobe lokɔ ãye lenyɛ kayite ãye odenyinawi ãye ɔnɔnɛ.

XXXVI Nte eyafuta mi ni, etayaamo mi kī miwaa tida.

XXXVII Letsa a kī mabi mi a, ade foe moape a mabi bati flee kī mina ne kukūmane kame.”

## XIV

*Yudafɔ Basɔfɔnokɔɛ Napi Adzuni Ne Yesu Kako Akū.*

I Kite fuwi nviā kī Yudafɔ aanya Wuda Katē Luwi, kī bate ane ne be kadzakū ne Egipte akū a, mo Abodoo Kī Etáyila Luwi. Basɔfɔnokɔɛ a mo mbla batsane kawε osi a kī baatsā ne kabela kame bipi Yesu beko ye.

II Bele kī, “Ketáne kī bokena foe ne fuwi kanya a kame, kitonekī bati aado otutū ne omaī a kame.”

*Otsole Odi Tsela Yesu Kugua Ne Betania.*

III Yesu na ne Betania omato kame ne Simon kī eso tō foso ngbā a awā. Kī Yesu dzi ekanya a, otsole odi kī enee tumpā kī eyi mo kugua mo olē kī kote koya paa a wo ne kola a kame. Otsole a binya tumpā a ade etsokui kugua a flee eko ne Yesu lolɔ kame a.

IV Ade bati a kī bedzē ne awā a badi na kalokpa bele kī, “Litsa sū yabula kugua mo koya kīi kade?”

V Baapuli beno kugua mo olē kīi foba sika owoe fobo oha elale, lokoa bekoa se bekra ahiāfo.” Ne foe sū, bekā ye ane mo osī.

VI Lemε Yesu le kī, “Mifone ye awe. Litsa sū miaha ye? Ekena letsa wī ekpa yī.

VII Ahiāfo aana ne mi kame daa, ade miapuli mibumena be loko kī miawe a. Yī kō nlāana ne mi sekē daa.



VIII Otsole a kɛna lɛtsa kī yaapuli. Ɛnya loto ɛtsɛla yī sukɛna kugua kī yamanɛ yī eyi ɛkpa yī kabila.

IX Mabi mi nɛ ɔnokɔali kamɛ kī kako nyɛ kako kī baade Kalɛ Wī a lɛtsā nɛ katinya kamɛ flee ni, baalɛ kɔdzɛla nɛ lɛtsa kī otsole kī kɛna a akū bɛkɔa bite ye anɛ.”

*Yuda Tunɔ Kī Yaanyɛ Yesu Ɛkpa.*

X Ke liti a, Yuda Iskariot kī ɛnyɛ fɔto banyanɛ ewua-nviā a kamɛ ɔmɔa naa Yudafɔ basɔfɔnokɔɛ a sɛkɛ kī yaanyɛ Yesu ɛkpa be.

XI Kawɔlɛ de be nɛ fɔlɛtsa a akū, ade be malo bike otse kī baakpa ye sika a. Foesū Yuda kawɛ osi a kī yaatsā ɛnyɛ ye ɛkpa be.

*Yesu Nya Wuda Katɛ Funitsā Mɔ Ye Fɔtsa Bakɔlɛnɛ a.*

XII Nɛ Abodoo Kī Ɛtáyila Kanya Luwi lɛtonyade a kī bako Wuda Katɛ Kavelibi a akū a, Yesu fɔtsa bakɔlɛnɛ a via ye kī, “Ndia awɛ kī bɔlɔla bɔkpa nɔ luwi a funitsā kanya?”

XIII Ade Yesu do be kamɛ bati nviā, mɔ ɔlɛdo kī, “Minaa ɔmato a kamɛ, oti odi kī ɛnɔnɛ kugumi aatsɛlamɔ mi. Mitomɔ ye miwo nɛ tɔto a kī te kamɛ yaawo a,

XIV lɔkɔa mibi tɔto ɔlate a kī, ‘Fɔtsa Ɔtsanɛ a bo, “Ndia banɔvɔɛ kɔla a kī bɔmɔ yī fɔtsa bakɔlɛnɛ a aanya Wuda Katɛ funitsā a deĩ?” ’

XV Ade yaatsa mi abansulu kɔla baũ awā kī bɛhɛhɛ biyi kɔkɔɛ. Milɔla awā mikpa boe funitsā a kanya.”

XVI Fɔtsa bakɔlɛnɛ a dzakū bɛnaa ɔmato a kamɛ, ade bɛnamɔ fɔtsa flee ndɛ ayekī Yesu bi be a. Ade bɛto Wuda Katɛ funitsā a nɛ awā a.

XVII Kĩ olobe wo ɔto a, Yesu mo ye fɔtsa bakolene ewua-nviã ya ne awã.

XVIII Ade kĩ bidzi banya a Yesu le kĩ, “Mabi mi ne ɔnokɔali kame kĩ mi kame ɔmoa, kĩ bomo ye budzi boanya aanye yi ekpa.”

XIX Fɔletsa kĩ ha be, ade bekavia ye ɔmoa ɔmoa kĩ, “Yi mane mbɔee?”

XX Yesu kpa mbuaye kĩ, “Enye mi ewua-nviã a kame ɔmoa, oti a kĩ ye awe dei ne sooda kame mo yi a.

XXI Otidziwa Obi a anaaku nde ayekĩ Katsela Kpalewa a le ne ye akũ a. Leme boboe makpa oti a kĩ yaanye Otidziwa Obi a ekpa a. Nte betama oti a na ni, kufe fonene fokpa ye.”

### *Boe Jlate a Olobe Funitsã Kanya.*

XXII Ade kĩ bekanya a, Yesu boe abodoo, enye Baguma kole ne ye akũ, ade ebuli ye ekpa ye fɔtsa bakolene a, ele kĩ, “Mite minya, ade yi sukena a.”

XXIII Ke liti a, ebɔe koo pu mo waĩ, enye Baguma kole, ekpa ekpa be flee bekate kamoa.

XXIV Ade Yesu bi be kĩ, “Ade fukĩ nye yi apam baboane a kĩ biwula ne bati pii lolɔ a.

XXV ɔnokɔali a mabi mi kĩ nlaabuki mmoa waĩ adima kenaawo luwi a kĩ maamoa waĩ vɔe ne Baguma legakanyakɔ a.”

XXVI Ke liti a, besã tonɔ bimu Baguma, ade bene benaa Kugua Futse ɔto a akũ a.

### *Yesu Le Eyi Kĩ Petro Aasĩ Kĩ Enyina Ye.*

XXVII Yesu bi be kĩ, “Mi a flee mialo mifone yi, kitoneki bele ne Katsela Kpalewa a kame kĩ, ‘Maako baveli akũ odamenane a,

ade ye baveli a flee aapansam a.’

XXVIII Leme nte bedzela yĩ ndzi nkpã ni, maanya mi loto ne Galilea.”

XXIX Ade Petro bi ye kĩ, “Yĩ kõ, nláalo nfone no da, nte be nkae a flee lo malo!”

XXX Yesu bi Petro kĩ, “Mabi no ne onokali kame kĩ fomoko okoko aabe titi nviã lenye kĩ ni, aale titi elale kĩ onyina yĩ.”

XXXI Leme Petro buki ebi ye mo osĩ kĩ, “Nte kene kĩ bomo no buku malo ni, nláale kĩ ñnyina no!” Fotsa bakolene a flee le kale moape a.

### *Yesu Bwa Mpaε Ne Getsemane.*

XXXII Beyawo kako kadi kĩ bave Getsemane, ade Yesu bi ye fotsa bakolene a kĩ, “Midzi ne awĩ lokoa nnaabwa mpaε.”

XXXIII Ade ekpã Petro, Yakobo mo Yohanes ebumo ye akũ a. Kaloe mo libe wo ne ye kame, ekatila blibli, blikli,

XXXIV ade edani ebi be kĩ, “Ayoloho te yĩ owole kame paa nde maku. Midzi ne awĩ, mikaadã foko.”

XXXV Kĩ enaa loto sukuloo a, eka etsa ne tite ebwa mpaε kĩ, “Nte foadã boεε ni, lubo kamo loko kĩ letẽ ne yĩ akũ.”

XXXVI Ade ele kĩ, “Nda, yĩ Olega, apuli kakena letsa nye letsa. Nye lubo kamo kopu kĩ ne yĩ akũ. Leme nné letsa a kĩ mawe, mbom letsa a kĩ no awe.”

XXXVII Ke liti a, emuniki eyamo ye fotsa bakolene elale a kĩ bewa tida. Ebi Simon Petro kĩ, “Simon, tida owaa? Otapuli odzi odã foko douhuile moape malo?”

XXXVIII Ade ebi be kī, “Mina ne kukūmanε kame lokoa mikaaboa mpae ayekī miláawo ne sohuiε kame. Hūhū a awε lemε sukena a kō lelá kobē.”

XXXIX Yesu buki emuniki enaboa mpae ele foletsa moape a.

XL Ebuki emuniki enaa ye fotsa bakolene a sekē enamō kī bewa tida. Betápuli bibinya anε, tida deī ne be anε ade betányi letsa kī bale benye be akū onukpē a.

XLI Kī ebuki emuniki eya lelalede a, evia be kī, “Tida mibuki miwaa miaweya? Fole! Odoū a wo oto! Midā, bekōa Otidziwa Ōbi a, bado ne tokpa bakenane awε.

XLII Miyidza mifō bonaa. Midā oti a kī yaanye yī ekpa a fuā.”

### *Bipi Yesu.*

XLIII Yesu buki elamo kodzela fomō Yuda kī enye be ewua-nviā a kame omōa yanε eta. Bati kodabu a kī basofonokoē mō mbla batsane mō omato banokoē nye bibu a tomō ye, ade benεε fopame glele glele mō titse fukū a.

XLIV Oti a kī enye ye ekpa a kpa be nsentseleni eyi kī, “Oti a kī míamō kī ndzeme ye onukpē a ni, ade ye ne awā a. Mipi ye mikpā minamena, lokoa mi anε ena ne ye akū.”

XLV Kī Yuda sila ewo awā a, enaa Yesu sekē eve ye kī, “Fotsa Ōtsane!” ade edzeme ye onukpē a.

XLVI Foesū bipi Yesu, ade bipini ye kooba a.

XLVII Lemε bati a kī bedzē ne awā kame omōa vele ye kopā enye ebaa Ōsofonokoē Flee a osumune soto emuni.

XLVIII Ade Yesu bi be kī, “Fusī kī miale apā mō titse fukū miya kī miaayapi yī nde tōkpa ōkenane mane?”

XLIX Luwi daa mana ne mi sekē ne Asoli Kola a kame, katsa fotsa, leme mitápi yī. Leme kene kī Katsēle Kpalewa fōletsa a foya ne foe kame.”

L Ade ke ye fotsa bakolene a flee lo befone ye a.

LI Ne lokō a kame a, opopobi odi kī esua aklala lima odi akū tomena Yesu. Bati a we kī bapi ye,

LII leme ewolo ye lima edo be ne awe, ade elo mō odzo a.

*Yesu Dza Ne Yudafō Omāi Fōletsa Badzene Anē.*

LIII Ade bekpā Yesu benamena Yudafō Ōsofōnokōē Flee a tōtō kame, awā kī basofōnokōē, omato banokōē mō Yudafō mbla batsane a kpota a.

LIV Petro tomena ne liti flee, eyawo ne Ōsofōnokōē Flee a lowabe. Ekēna akū edzi ne basumune a owē bekawa fi.

LV Yudafō basofōnokōē mō fōletsa badzene a kī bidzi ne awā we fōletsa kī batsua bite ne Yesu akū bekōa beko ye wuda koto, leme betána fudima ne ye akū.

LVI Adansifo pii yama fōvā bite ne ye akū, leme be adansie kadi táketi mō akū.

LVII Ade bati badi yidza bedza bema fōvā kī,

LVIII “Bunu kī ele kī, ‘Maabubuli Asoli Kola kī kī bike mō awe a, ade ne fuwi elale liti ni, maake kobebā kī nné awe bekōa bike.’ ”

LIX Leme bati kī adansie malo táketi mō akū.

LX Ōsofōnokōē Flee a yidza edza ne bati a flee anē, ade evia Yesu kī, “Ōlánye onukpē ne fōletsa a kī belamō kale katia nō a?”

LXI Leme Yesu sua onukpě etále kadima.

Ɔsofɔnɔkɔě a buki evia ye kī, “Nɔ nye Kristo, Nhila Ɔlate a Obi a?”

LXII Yesu bi ye kī, “Ye manɛ, ade míamɔ Otidziwa Obi a kī edzi ne Baguma Kpale a somɔna, ade yaato ode eya ne luflututu kame a!”

LXIII Ne awã a, Ɔsofɔnɔkɔě Flee a bě ye atadie kame ne kalɔkpa kame ele kī, “Botábuki busĩ ɔdansini odima!”

LXIV Minu ye mbusuo fɔletsɔ a. Litsa nye mi adzuni?”

Adeke be flee bitunɔ yɔ kī eku kɔtɔ ade efeta ekpa wuda a.

LXV Be kame badi yi kayɔ mɔ tanɛ katua kako ne Yesu akū, badi sua ye anɛ, bekake ye fukpeni kavia ye kī, “Bi boe owula kī ebɔa nɔ!” Ade badāmenanɛ a kpã Yesu bebalebale ye awɛ ne tɔlɔtɔ a.

### *Petro Sī Kī Enyína Yesu.*

LXVI Kī Petro buki edzi ne lowabe a, abawa adi ne Ɔsofɔnɔkɔě Flee a tɔtɔ kame a ya ne awã.

LXVII Kī emɔ Petro kī edzi yawa fi a, ebě anɛ edã ye ade ebi ye kī, “Nɔ malo otomɛna Yesu Nazaretni a!”

LXVIII Ade Petro sī ele kī, “Ínyína letsama, ade maánu letsɔ a kī ale a malo a!” Ade enɛ enaa onyukpě a. Mɔ ye awã kawo pɛ mɔ ɔkɔkɔ nye onukpě.

LXIX Abawa a buki emó ye ne awã, ade edo bati a kī bedzě ne awã kabi awɛ kī, “Enye be kame ɔmɔa!”

LXX Leme Petro buki esĩ.

Owi tábuna mo bikĩ bedzě ne awã bi ye kĩ, “Ōláapuli osi kĩ onyé be kame omoa, kitonekĩ no malo Galileani ane.”

**LXXI** Ade Petro do kadum mo katani awe kĩ, “Ntani kĩ onokoali male, Baguma evele yĩ soto nte fovã mama. Īnyĩna oti a kĩ ye foletsa milamena kale a.”

**LXXII** Deedimopape okoko be leyade, ade Petro te ane ne kale a kĩ Yesu bi ye a akũ kĩ, “Fomo okoko aabe titi nviã ni, aale titi elale kĩ onyĩna yĩ.” Kĩ emo ye akũ eyi osũ a, ebe blobblo.

## XV

*Bekpã Yesu Benamena Pilato Sekě Benadzemo Ye.*

**I** Onone tutuutu a basofonokoě a, omaĩ banokoě a, mbla batsane a mo foletsa badzene a tsena moatse benaa adzina ne Yesu akũ. Bisui Yesu ne towě kame, bekpã ye benado ne Pilato awe.

**II** Awã naa, Pilato via Yesu kĩ, “No nye Yudafõ Legã a?”

Yesu bi ye kĩ, “Oo, folã nde ayekĩ ole a.”

**III** Basofonokoě a le foletsa pii bitsua Yesu onukpě.

**IV** Foesũ Pilato buki evia ye kĩ, “Ōláakpa kale a mbuaye? Tse foletsa a kĩ belamena katsua kate ne no akũ a.”

**V** Leme Yesu tabuki ebinya onukpě ade Pilato kena saa a.

*Pilato Ko Yesu Wuda Koto.*

**VI** Kateli nye kateli, ne Wuda Katě luwi kanya kame a, Pilato afone oti moa ne abãã kola bawanẽ a kame, kĩ Yudafõ via a awe kakpa be.

**VII** Ne lokɔ a na kame a, onyole odi kī have Baraba waa kola mɔ bati bebã badi. Bati a yidza bedza ne Roma Abãã akū ade beko bati ne foe kame a.

**VIII** Kī bati kodabu a kpɔta a, bivia Pilato kī ekena seme kale kī yawe kakena kateli nye kateli a ekpa be.

**IX** Evia be kī, “Miáwe kī nfone Yudafɔ Legã a awe nkpa mi?”

**X** Pilato via fukī kitonekī enyina yededeede kī lineke sū mɔ basofonokɔẽ a kɔa Yesu bido ne ye awe.

**XI** Leme Yudafɔ basofonokɔẽ kɔa bido ne bati kodabu a kame kī bivia Pilato efone Baraba mbom awe ekpa be.

**XII** Pilato buki evia bati kodabu a kī, “Kekɔ litsa miawe kī nkena oti a kī miave kī Yudafɔ Legã a?”

**XIII** Ade bebɔa fɔwɔla bibi ye kī, “Bɔa ye ne asendua akū!”

**XIV** Pilato via be kī, “Litsa tokpa ekena?”

Ade be flee bebɔa fɔwɔla kɔɔba kī, “Bɔa ye ne asendua akū!”

**XV** Pilato we kī yakena ne bati kodabu a kawe akū ekpa be, foesū efone Baraba awe ekpa be, ade kī efɔ sodzafɔ bo Yesu paa mɔ mpile biyu a, ekɔa ye ekpa sodzafɔ a kī benaabɔa ye ne asendua akū.

### *Sodzafɔ a Di Yesu Nsekuo.*

**XVI** Sodzafɔ a kpã Yesu biwomena ne abãã onokɔẽ a tɔtɔ a lowabe, ade beve sodzafɔ nkae a beyakpɔta a.

**XVII** Ade bekɔa lima ngbã atadie wulaa bido ye, beno fɔtsɔlewe lobɔe betsa ye a.



**XVIII** Adeke bekawõna ye kī, “Yiiduu! Yudafɔ Legã, lidzi nkpã gɛɛɛɛ!”

**XIX** Bibo ye nɛ lɔlɔ mɔ otse, bitua tanɛ biko nɛ ye akū, ade bike aduli bekɛna fɔlɔ bekpa ye a.

**XX** Kī bidi ye nsekuo biyua a, benye atadiɛ ngbã a nɛ ye akū, bimuniki mɔ ye mɔawɛ tide bido ye. Ke liti a, bekpã ye benɛmena kī banaabɔa ye nɛ asendua akū.

*Bɛbɔa Yesu Nɛ Otse Akū.*

**XXI** Kī banaa a, betselamena onyole odi kī bave Simon kī eto akula adi kamɛ yanaa ɔmato kamɛ. Ade sodzafɔ a hɛ ye kī etɛ Yesu asendua a ɛlɔ a. Simon kī to Kireneni ɔmato a, ade enye Aleksandro mɔ Rufo ɔɛga a.

**XXII** Bekpã Yesu benamɛna kako kadi kī bave Golgata, kī foe kayɔ nyɛ oti lɔlɔ fɔtsõ.

**XXIII** Ade awã bekpa ye wã kī betsekamɔ otsonu kī yadina akū kawo kī ɛmɔa a, lɛmɛ Yesu támɔa be.

**XXIV** Sodzafɔ a bɔa Yesu nɛ asendua akū ade beta bavulibi nɛ ye tetadiɛ akū bɛmó ekī yaanya odi nyɛ odi ade a.

**XXV** Bɛbɔa ye nɛ asendua akū nɛ ɔnɔnɛ tɔdɔũ evedi kamɛ.

**XXVI** Ade betselɛ ye onukpɛ katsua fɔletsã bɛbɔa nɛ ye lɔlɔ nyange kī, “Yudafɔ Legã a.”

**XXVII** Bɛbɔa bayekpane nviã lɛmɛ nɛ asendua akū bibumɔ Yesu, ɔmɔa nɛ ye sɔmɔna, ɔyade nɛ ye sebã.

**XXVIII** Nɛ osi kī akū, letsã a kī betselɛ nɛ Katselɛ Kpalɛwa a kamɛ a ya nɛ foe kamɛ kī, “Bibu ye bido nɛ tɔkpa bakɛnanɛ kamɛ.”

XXIX Bati a kī bekatē a kpokpa folo ade bivūna Yesu kī, “Ao! Nọ a kī ọle kī aaveli Asoli Kọla a obuki oke kọbebā ne fuwi elale liti a ne awī a?”

XXX Duma ne asendua akū, kanye nọ akū!”

XXXI Ade ayea Yudafo basofonokōē mọ mbla batsane a lemε di ye nsekuo bekabi akū kī, “Ete bati bebā nkpā, lemε yaápuli ete ye mọawe akū.

XXXII Mifō Kristo, Israelfo Legā a eduma ne asendua akū finyaa bọmọ lọkọa bọte ye budo” Ade bati nviā a kī bebọa ne asendua akū bibumọ Yesu a, lemε vūna ye a.

### *Yesu Ku.*

XXXIII Kī suwa tọdọū ewua-nviā bọa a, katinya kame flee ke ọtū, kenawo tọdọū elale kame.

XXXIV Ne tọdọū elale kame a, Yesu bọa fowọla kọbọa ele ne Hebri tide kame kī, “Eloi, Eloi, lama sabaktani?” Foe kayọ nye, “Yī Baguma! Yī Baguma! Litsa sū ọfọne yī awe?”

XXXV Bati a kī bedzē ne awā a badi nu letsa kī ele a, ade bele kī, “Mitse! Yave Baguma Onukpē Ọnyene Eliya.”

XXXVI Be kame ọmọa wula atse enabọe kanyinya butubu ọsapọ kī edo ne waī mọ ọnye kame ade edela mọ otse ekpa Yesu kī emọa a. Ade oti a kale kī, “Midza, mifō bọdā nte Eliya aaka eyaanye ye ne asendua a akū!”

XXXVII Yesu buki ebọa fowọla kọbọa ade emena onukpē a.

XXXVIII Ne lọkọ a na kame pe, Asoli Kọla lima kpale a kī litsua koe kame a bē ne kayite, kito nyange keyawo kayọ.

XXXIX Ade kī sodzafọ ọnọkōē a kī edza etselamena asendua a nu Yesu fowọla kabọa mọ

ayekĩ eku a, eɛ kĩ, “Nuwĩ foane kĩ oti kĩ nyɛ Baguma Obi.”

**XL** Batsole badi lɛmɛ dza mɔ lugo bɛkadã. Be kame badi nyɛ Maria Magdalani, Salome mɔ Maria kĩ ye babi nyɛ Yakobo obisẽde a mɔ Yose.

**XLI** Lokɔ a kĩ Yesu na nɛ Galilea, ade be lɛkatomɔ ye bɛkabumɔ ye a. Batsole bebã pii kĩ bitomɔ ye beya nɛ Yerusalem a lɛmɛ na nɛ awã.

### *Yesu Kabila.*

**XLII** Fotsa kĩ flee ya nɛ luwi kĩ lenya Kaweya Luwi a lotɔ. Nɛ olobe lokɔ a,

**XLIII** Yosef kĩ eto Arimatia omato a ya. Enyɛ oti kĩ edeĩ obu nɛ foletsɔ badzɛnɛ a kame, ade edzi yadã Baguma Legãkanyakõ a kaya anɛ a. Yosef do owɔle enaa Pilato sɛkẽ eke ye aduli evia kĩ efɔnɛ Yesu onɔkpa a awɛ ekpa ye.

**XLIV** Fokɛna Pilato wãwã kĩ enu kĩ Yesu ku kɔkɔɛ. Foesũ evɛ sodzafɔ onɔkɔẽ evia ye kĩ nuwĩ Yesu ku kɔkɔɛ.

**XLV** Ade kĩ onɔkɔẽ a bi ye onɔkoali a, Pilato kpa Yosef osi kĩ enaavenya onɔkpa a.

**XLVI** Ade Yosef naya aklala, ade kĩ enavenya Yesu onɔkpa a, esuli ye nɛ lima a kame. Ekɔa ye ewola nɛ linikɛ kĩ benyɛ nɛ de okɛ kame, ade emilinya de kpale ebale linikɛ a onukpẽ a.

**XLVII** Maria Magdalani mɔ Maria kĩ enyɛ Yose omã a dza bɛkadã, ade bemó awã kĩ bɛkɔa Yesu onɔkpa a bibila a.

## **XVI**

*Yesu Yidza Eto Banɔkpa Kame.*

<sup>I</sup> Kĩ Kaweya Luwi a wũna a, Maria Magdalani, Maria Yakobo oma mo Salome benaya kluboũ kĩ banaatsela Yesu onokpa a.

<sup>II</sup> Ne Ekwansieda onone tutuutu a, kĩ suwa de a, biyidza benaa linike a akũ.

<sup>III-IV</sup> Kĩ banaa a, bekavia akũ kĩ, “Owei aamilinya de kpale a ne linike a onukpẽ ekpa boe?” De a pone lububu paa. Kĩ bedzela ane bedã a, bemó kĩ bimilinya de a biyi ne owẽ kókoxe. <sup>V</sup> Foesũ biwo ne linike a kame. Adeke bemó opopo odi kĩ edo atadie wulaa fitaa edzi ne somona semake, ade bebõa oblia.

<sup>VI</sup> Opopo a bi be kĩ, “Mitavila. Yesu Nazaretni a kĩ bebõa ne asendua akũ a, miawe. Elãa awĩ kũ. Eyidza edzi nkpã! Midã, ade awĩ bekõa ye bewõla a.

<sup>VII</sup> Minaabi ye fotsa bakolene a mo Petro leme kĩ, ‘Yesu nyaa mi loto yanaa Galilea, ade awã míamo ye nde ayekĩ ebi mi eyi a.’ ”

<sup>VIII</sup> Foesũ batsole a ne bilo atse bedzakũ ne linike a owẽ ne libe mo kukũtila kame. Betãbi odima kadima kitonekĩ bekavila.

### *Yesu Nye Ye Akũ Etsa Maria Magdalani.*

<sup>IX</sup> Kĩ Yesu yidza eto banokpa kame ne Ekwansieda onone tutuutu a, enya loto enye ye akũ etsa Maria Magdalani, kĩ ye kame eblomena hũhũ kpa evũkonõ etomena a.

<sup>X</sup> Ade ye lenabi bikĩ bitomo Yesu tõ a folets a. Bati kũ dzi bekabe ayolohõ ne ye wuda a akũ.

<sup>XI</sup> Leme kĩ Maria bi be kĩ Yesu yidza edzi nkpã, ade kĩ emó ye malo ni, betãte ye bido.

### *Yesu Nye Ye Akũ Etsa Ye Fotsa Bakolene Nviã.*

XII Fukĩ liti a, Yesu nye ye akũ etsa ye fotsa bakolene nviã kĩ Bito Yerusalem banaa akula, leme betámɔ ye biyi osũ ne kayokayi a.

XIII Bimuniki benabi be nkae a, leme be malo betáte bido.

*Yesu Nye Ye Akũ Etsa Fotsa Bakolene Ewua-odi a.*

XIV Ke liti a, Yesu nye ye akũ etsa fotsa bakolene ewua-odi a kĩ bidzi banya. Leme ekã be ane kĩ betána katekado, mɔ kĩ bena ato osĩ, betáte bati a kĩ bemó kĩ ye edzi nkpã a leme bido a.

XV Ebi be kĩ, “Minaa katinya kame flee minaale Kale Wĩ a mikpa batidziwa flee.

XVI Odi nye odi kĩ ete edo, ete mui kawola leme ni, baate ye nkpã, leme odi nye odi kĩ etáte edo ni, baako ye koto.

XVII Baguma aakpa bate badone a kobẽ bekena awãwã fotsa. Baablomena hũhũ kpa benemena ne yĩ dĩ akũ, baale tide vɔẽ.

XVIII Ade nte bipi kɔe ãye bemɔa otsonu kpa ni, foláakena be letsama. Nte bite awe ne basone akũ ni, baana akũ osĩ.”

*Baguma Bɔe Yesu Enamena Ode.*

XIX Ke liti a, kĩ boe Olate Yesu le kodzela mɔ be eyua a, bebɔe ye benamena ne ode ade enadzi ne Baguma somona a.

XX Ye fotsa bakolene a nale Kale Wĩ a ne kako nye kako. Boe Olate a kena adzuma mɔ be, ekɔa awãwã fotsa a kĩ bekakena a ete de kĩ be folets a nye onokoali.

lxx

**Baguma Apam Vɔɛ a Tuwuli**  
**Tuwuli: Baguma Apam Vɔɛ a Tuwuli New Testament**  
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 28 Dec 2024 from source  
files dated 29 Jan 2022

68df0193-2981-5275-8994-8f743fe01e5e